

928
7
8

陳
迦
陵
文
集

八





湖海樓詩集卷六

宜興陳維崧其年著

長洲宋實穎既亭

丹徒張玉書素存

秀水彭孫適美門選

山陽李鏡公凱

戊午

弟 維岳緯雲 叅閱

宗石子萬

男履端

姪 洵 校

張爾成先生招同白仲調家緯雲弟燈下賞菊次日

作長句奉謝兼柬令嗣子淑孝廉

長安九月西風襲蘆溝木葉羣蕭騷
捷關頓苦客懷惡過市頗厭人聲
躑無何眉端溢黃色少頃戶外喧松
濤打門忽送赫蹠至快若背癢逢爬
搔野人一生負花癖先生百

代推入豪評事詩才扛鼎謂仲小季吟興凌猿謂猿

賢郎英發更溪穩丰骨颯爽空吾曹謂子是時霜院最幽

靚漸覺暝色紛週遭風枝烟萼秀而整明燈軟慢低還高

幾叢廊後極向背萬朵燭下呈纖毫先生笑勸松花醪謂

客且復持雙螯君不見昨年羽書獻西極王師一戰收臨

洮又不見今年樓船掠南詔猛將十道搜哀牢殿前上書

悉嚴助闕下獻頌多王褒太平幸藉君相致芻輓忍久農

昨勞諸君努力須題糕不爾浮拍仍餽糟好花良夜不長

得莫信喔喔雞三號

寄贈園次是歲園次六十

湖州刺史蘓州客聞苑仙吏來塵凡青山綠水舊官長漫
郎聲叟新階銜當時一麾遂出守鉏蕪稂莠工爬芟在溪

詎肯受束縛梁極乃或叢譏讒倔強竟下考功第嘯傲便

脫朝堂衫姑胥崎麗美無度使君跌宕誰能監屋頭洞庭

雪髯髯籬角鄧尉花摻摻血色羅裙閣阮咸邏迤作柄黃

金嵌雄蠶雌蝶夜啁哳雛鶯乳燕晨呢喃千杯已見笑眼

纈七字忽破歌喉緘先生興發不暇嬾突若快馬追麀麋

花妖月祟乞摹畫烟魂雨魄愁雕鐫今年翹材大闢館谷

鑿澗壑求楠杉班張崔蔡滿車載翻令此老淹空巖先生

仲冬正六十蓴羹竹醢調酸醎高吟鳳毛迭賡唱爛醉蠻

素爭扶攬我今久滯薊城北作詩遠附江東函遙憐勝侶

色先悵更憶故國涎尤饒細梅小受玉手摘碧鱸恰待霜

碓剗願沽雙斗雪凍酒亟挂半幅烟江帆

王敬哉先生招飲兼枉贈詩卽次原韻二首

頽洞商飈動早涼西山爽氣入華堂吳羹細糝鱸腮滑官
焙輕分鳳餅香花外幾人知往事菊前何日不重陽年年
海鶴精神健料理牙籤曬錦綉

其二

忽聞入破唱伊涼回憶曾經到後堂新竹放梢牆已過古
苔成蔓屐尤香飛騰敢附燕山隊嬾漫終歸楚水陽不爲
銜杯情興劇羨公挿架總青綉

王大司馬胥庭先生招飲怡園同陸翼王鄧孝威毛

大可田髯淵朱錫鬯李武曾周次修分賦

九州饒園圃與府首京洛秦晉太莽蒼吳越極秀弱恭惟
帝王都地脈大包絡鴻濛相蕩瀟溟津恣旁魄陰陽爲洪
壚元氣佐鼓橐風紫吼漁陽天青洗魏博煌煌宛平公森

爽鬱盤礴兩世躋六卿一門近五柞前年拜樞密隻手運
翰畧已聞翦羆豕亟欲徙鯨鯨憑軾禮單寒卷帳麾褒鄂
老謀陣魚鳥餘興及猿鶴觀其措置間一一非苟作烟霞
歸部曲沙石就鑿鑿入門草色淨壓架竹光薄捫蘿歷屣
屣剝蘚穿确硤偃樹仰尻雕缺崖豁齷齪有木盡離披無
峯不拏攫數折迴踰恒千盤倏非昨遂從羣山巔了了見
簾箔紺壁裊迴廊華飈蕩深幕欄前極疎放軒後最開拓
曲室皮琴尊周廬匝鈴索朱堂突崔巍頽館倍的灼揖客
萃袿裾張筵展諧謔維時九月暮菊瘦弄餘萼雜沓方圓
陳飛騰羽觴錯雪柅映駝羹銀匙滑羊酪粗妝紅旋酥旗
槍翠初淪主人語坐客小築意有託吾父太保公遐齡壽
平格當其壯健時愛踏登山屨朝眠潭柘寺晚飯來青閣

頻歲休杖屨不欲煩腰脚山游悵莫遂似負平生諾所以
營丘園於焉代巖壑兒孫互灌花鄰叟共行藥娛親聊復
爾詎屑鬪粉堊語罷客離立四座色寂寞仁親公所敦曾
閱古誰作洛陽諸苑囿一徃掃秋籜想彼締造初竟欲吞
寥廓豪只通賓客鄙或縱聲樂何如此怡園淳意發渾醞
酒酣俯絕澗光景益駭愕其下百丈寬其上十仞削莫輕
燃犀照怕現魚龍惡更顧坐客語此月泉源涸儻逢春夏
交谷簾灑瓔珞銀床樹杪懸素練窓中落豈惟垂綸釣直
可移船泊嘉陵詎不如斜川或相若衆賓聞言喜我亦起
雀躍遂復踐坡陀旋爲渡畧徇丹樓忽天半華棖耀城郭
翻身使之高飛步躡鳥鵲憑欄絕叫跳脫帽縱狂噉皇州
但一氣彩翠走廣漠霜黃三殿瓦賤赤千門鑰瞳矐飛廉

鐘翁耄觥稜爵西山稍霧霾未肯便綽約餘皆色態呈競
炫腰身各吾生遭泥塗百事受拘縛茲游實快意譬望屠
門嚼獨恨日下春預愁街沸柝隳黑騎馬去秋燈睡難着
何時風中琴再就林間酌翻羨作園官爲公把鉏耰

曹玉淵有綠水送春帆之句賦贈二絕

十幅蠻箋色勝銀東阿才思又清新如何綠水春帆好只
鬪詩名不載人

其二

撲來陌上紅千斛夢去溪頭翠一函不分曹郎太相惱見
人騎馬說春帆

李岷瞻以素繭索詩走筆爲作長句

李侯一生擅竒作洮雲隴水爭新鮮險勢直可懾百怪猛

氣竟欲空三邊我生萬事總粗醜腕內有鬼愁雕鏡近來
筆力苦奇鈍復有塵空來縈牽打門誰送紙一束幅滑
若春籬烟我詩既劣字更拙春蛇秋蚓紛糾纏巧牆疥壁
尚不可矧敢汚汝松花牋長安臘盡后土凍皮肉皸瘵形
拘攣故鄉梅樹漸着葢日夜想像無由還聞君卧疴我亦
爾正少秀句供流傳數朝料有六花墮玉龍嬾惰風爲鞭
豪情苦受寒餓減俗胃恰須冰雪湔此時得句定相訪看
我雪後詩狂顛

送黃俞邵南歸

時聞太夫人訃

萬事復何道君今如此歸行藏無一是忠孝愴俱違久識
浮名誤翻悲讀古非前途多北雪切莫灑麻衣

羅太公新祀鄉賢詩以紀事

侍御振羹先生王父

言從石頭城偶經石頭寺其旁祠一區其境更幽邃修壑
鬱盤陀流泉映清泚入門便肅穆起我嚴憚意四顧劇清
蒼萬象絕纖媚父老爲我言歷歷有次第吾鄉羅太公積
德極醇摯作人愛謹潔挽俗厭澆僞生平大節駭覲縷未
遑記昨過螺南巷居人話遺事一夕太公歸月明人薄醉
路逢誰何人捐軀徇詎諱太公亟援手腐骼復生骸炯然
急難心豁達露造次以此概其餘良足發深喟我聞古祀
典原不繫名位令甲閩幽光祇爲風末季邇來浸濫觴俎
豆亦希冀烝嘗鬼詎饗貪冒天所忌必如我太公悅服到
童穉九州修里社惟此曰無愧再傳挺侍御凜凜廊廟器
河流泝其源葛藟念所庇我爲一再拜桓碑兀鼻屨殘照
入祠堂悠然滴空翠

壽益都相國馮易齋先生七十

朝回銀燭散紅牆上相懸弧畫錦堂壽極平臨輝大樹沙
堤直築傍長楊九霄裘舄心偏赤五夜鹽梅髮已蒼聞道
薦賢頻補牘每承天語夜琅琅

其二

益都舊是青齊地東望蓬萊水勢渾一縷青纜生大海五
更紅已射朝曦從來嶽瀆關元老坐使夔龍翊至尊好待
普天銷戰鼓留侯辟穀莫輕論

其三

郭外毳毳萬桺強新成相國午橋莊谿衒峭壁凌飛動颯
沓盤渦逼混茫分得堂餐時餉鶴繙來閣帖更添香參霄
戰壑材何限砌下孫枝盡棟梁

其四

曾從閣下吐車茵自愧中宵叩角人位極公孤心轉細詎
緣疎賤感尤真只憐客善題鸚鵡始信朝須養鳳麟此日
一尊剛介壽長安煖律已回春

送宋牧仲員外出權輿關

毘盧閣前西日昏高梁橋下寒河渾北風吼雪雪大作半
捲不捲紅旗翻此時別我向何處得毋奉使通樓煩自從
羽書暗江介黑雲濁浪砰江豚須臾七閩鏃逆節俄頃百
粵收強藩賤錢寶布蔽江下鸞帆洋船連檣奔憑誰算緡
佐國計仗汝監稅克泉源此行甚壯極忼慨只我惜別頻
煩寬身雖吳人過宋久十年僦屋梁王園君家本號丞相
後才大目短曹劉垣角鷹會獵雪爪競快馬斫陣霜蹄掀

姚黃大者推金盆邀我說餅城東村擣壘抑鮓檀方法研
 箏摘阮精討論北里小部白翎雀西苑老輩康崑崙十雙
 絳熾欺朝曦茸衫熨得檀槽温在旁劉毅能知狀謂山是
 夜徐摘也斷竟謂恭人生歡樂會有極一鞭又出垵澤門
 君上天邊跨黃鵠我歸田畔騎烏犍我家箬嶺藝茶竹其
 俗瓦市陶甌靡釣魚射鴨擬終老山翁溪友時枉存今年
 一事大難料强策跛驚追駢駢長安俗薄屢推罵僅獲君
 輩來寒暄誰令君復別我去此後那肯相為言男兒百事
 不掛臆只愛舊雨交攀援玲瓏久散龜年老隔年事已成
 開元我今縱有送君曲曲調不覺攪巴猿章江花月亦大
 好素馨價或低山礬對花酌酒儻相憶早覓魚素隨潺湲
 上大司寇蓼翁宋老夫子五言古詩一百二十韻

兩儀代網緼圓穹逶迤幹山川積德刑嶽瀆配英傑堂堂
 宋夫子落落超門閥家有伏生經床留魏公笏炯然一寸
 腸忠孝互盤鬱儀觀擅峻整丰度挺矧肆弱冠躋藝林聲
 名走吳越許與必老蒼提攀總僑肸搗詞極深穩臨文最
 縝密擺落擊悅言力存正始骨羣兒競雕鐫鉛槧日搨搨
 公方用深意頗若有不屑釋屣踐玉堂翔步登金闕屢擢
 領清華歷官參密勿升朝三十載矢與膏脂絕天子稔清
 貧羣公愛謹絜講易闡義文經邦弘稷契烏臺肅綱紀禮
 闈芟軋茁生平憂國疏一一霄漢揭薄海病瘡痍羣方苦
 苞蘖有劄盛一囊剔燭細繙閱平明趨殿陛只欲陳顛末
 每聆天語褒要俾臣衷竭龍飛我
 世祖謳歌徧溟渤

今皇仁孝思詔許官僚迷羣臣啣命退握管競惕怵祇緣
功德高翻慮言辭拙公拜再薰沐覃精務掬截單詞歸鄭
重軼事總詳晰慘淡繪天心縱橫穿月窟九重頻嗟咨五
夜親甲乙乃於衆作中獨用一人筆須臾園陵上蒼然屹
碑碣蚴蟻翠螭盤黠黠卿雲霤此皆關掌故件繫在史帙
上者銀管編次亦石匱編惟餘家庭事他人或未悉而我
屬淡知忍使就湮沒前明遭末造國步日以蹶忼慨先中
丞艱難擁旄鉞是日哭登陴於焉怒衝髮陰風助悲號陣
馬羣嗚咽大呼誰強起屢鼓難成列倉皇裂甲裳感奮握
符節透爪并穿齧屠腸復灑血遂令營丘城愁雲慘膠結
嗚呼稠濁世忠義誰剖別宮寺煽玄黃朝堂沸禱杙可憐
騎箕後輾轉橫誣醜冷落張睢陽淒涼段秀實公年十七

八憤氣填冢濶誓捐七尺軀生挽高堂訣間關抵輦下瞻
昧眊白日弱肉付灰釘如飴甘刺剗觀其訟父書字字吐
酸切至今淚點殷晶熒蹟難湮誰將祓不祥此幅卽桃荔
縱令巖壑錮還召風雷掣當時交動色異類亦吐舌旁觀
諸老成私許瑚璉質君親詎異理家國原合轍從來至性
人足補綱常缺今始券斯言益信百不失三荆盡凌雲小
季尤雋逸頻年上計偕比歲纏痲疾形骸漸黑瘦氣息僅
綿愒公聞搶地呼小草悔一出奈何同生人坐見鸞飛瞥
無何接惡耗沉痛欲引決豈期骨肉親歡愛從此畢家書
且以至潞河夕以發帆檣恨滯滯崑川路限超忽翻身上鞍
馬決計棄舟柁僮僕不克追妻孥詎遑挈其月正炎燄長
途更蹶躄扶桑焦渴烏腸谷鑿層鐵早行歷三舍晚飯破

數驛入門呼子敬當暑悲風颺心摧玉樹埋冤斷金刀折
卽此敦友于可以覘貽厥公家好男子嶢嶢若冰雪排空
鬣開張千里期一抹我公鄙躁進式訓勉謙吉隱囊玉塵
柄渠是他家物何心慕貂蟬蓄志安蓬葦我生長貴人延
之語良達尋常執袴態此事須洗刷所以諸賢郎持盈鮮
驕溢定識高門間底事煩著揲嗟予一鳩鷄於世若蠖蟻
何年鷹離韝終日蟻營垤賦性旣疎庸作人復坦率才因
貧賤退老受饑寒聒一身類人奴萬事同苟活豈無雲霄
輦頗欲相煦沫譬如隴山禽憫彼樊笈繼相憐過則已一
往興已輟公雖慎交游然亦多入室何緣華嶽胸乃不忘
一撮今年下明詔內外交薦拔我公夙昔心因之遂觸撥
竟將微賤名直向聖人說予生已遲暮近狀倍蹉跌飛揚

五色毫半爲窮愁奪雖蒙君相知未必泥塗脫要使羽毛
豐翻令顏面熱循分祇慚惶顧名真忝竊深愁報稱難豫
恐篇章劣蘆溝十月寒渾河北風冽晴天灰眯人雨後泥
沒膝借馬怯崩騰徒行畏疲茶還鄉偏有夢入世本無術
新正春意動柳眼明於鵲終歸阮公村且釣袁家渴細梅
行受摘黃獨會堪掘籬門通窈窕草閣憑疎豁遣興第尋
僧浪游惟到浙乍可任悠悠長將謝矻矻惟懷知已恩耿
耿不磨滅鍾期金可鑄趙勝絲當綴臨風一放歌西山莽
突兀

冬夜同王惟夏毛大可允大方雪岷飲毛會侯寓廬
分得衣字

頗愛祥符宰蕭疎只掩扉過君風雪夜挽我薜蘿衣半醉

吟難愜是夜席上擬重來興莫違
統如街鼓動跨馬且須歸

壽大司農梁蒼巖先生

春生臘底色昭融
雙戟懸弧屬上公
憶昨尚書持虎節
去頒天語靖鮫宮
千官祖帳枕榔黑
百粵迴颿荔子紅
手定蠻荒勲不細
親勞玉陛饗彤弓

其二

狼烟蜚霧未全收
辛苦中原百二州
萬竈熊貔喧壁壘
一軍蟻蝨上兜鍪
時艱真倚防邊將
歲紬頻紆仰屋籌
誰訴閭閻貧到骨
司農今是富民侯

其三

白日黃河百戰場
昔年使節下睢陽
寒門有弟嗟秦贄四第

子萬爲侯朝宗
僑時僑寓商丘高誼煩公問楚狂
一讀幾迴增感激
千山萬水劃蒼茫
髮毛衰颯馮唐老
今日方瞻數仞牆

其四

霞漿漱灑汎璫卮
爭唱棠村自度詞
多恐人間無此曲
從教月底任人吹
銀箏九疊翻宮本
紅燭三更寫色絲
歌罷青陽屏後轉
露桃催放莫嫌遲

張晴峯水部索雷琴詩漫賦長句

白項老鴉啼上樹
街南北風幾時住
黃塵十丈眯殺人
三日不得洗袍袴
張侯貽我玉版箋
要我禿筆吟么絃
龍香蛇跗百不見
出語那得清而圓
黃金之臺作平地
十到長安九敗意
桓山道士說興亡
焦尾何知爾許事
來朝手撥壓磚茶
擬倩雪甌烹葵花
請君暫鼓玉練瑣
使我耳畔聞

爬沙綉靴女伎莫輕學此曲不是箏琵琶

李梅崖先生招飲賦贈

九衢騁軒蓋烟塵塞空颺先生澹泊人悠悠鮮所向姿制
擅清羸襟期託蕭曠攤書雀啁簷丸藥鳩啼桁革帶似不
勝空香自來餉塔焉一室間散緩類恂讓及握三寸毫屹
若萬夫將九派夜濤轟兩嵯春溜漲淋漓到紙筆光怪滿
屏幃擘窠最謹嚴八分不流浪我吟西山詩舌橋臆絕唱
折柬招亦欲抱琴訪入門大笑劇脫帽互跌宕呼僮釘畦
蔬留客杓家釀熊白削凝匙蟻綠滴鳴盎飲罷一巡欄興
來兼植杖山行徧眷盜川觀窮滉瀆追思曩所經十事九
不忘惟餘一高樓怯寒未曾上至今胸臆間隱隱作惆悵

來年爰律動預想雜花放准擬倚欄看春山定多狀

冬夜小飲益都夫子齋頭嗣君躬暨以冊子索書賦

贈一首

燕京臘月北風吼細梅着蕊細如豆花羔壓酒潑鵝黃未
圻泥封暗香透章丘長鬚走急遞抱甕前爲相公壽是時
至尊幸南苑閣門晝靜稀文奏遙呼弟子到後堂徧洗罌
罌瀉芳酎子魚通印霜可斫茶餅頭綱綠堪鬪四筵飲比
落埭船半夜舞作迴風袖諸生出口笙筑諧二難列坐冰
玉糅季也更鋪雪色繭泥我杯乾吟一首對君決背爪觜
健愧我倚牆骨骼瘦多年老鐵苦塵霾徃徃橫遭蝸篆繡
君不見公侯之子復其舊男兒詎肯倚門胄他年看爾上
雲霄韋平世相君家又

除夕前二日同儲廣期過慈雲寺訪傳青主先生

北征鬱鬱傍京輦南望迢迢限鄉壘坐乏梅粧意不聊節
當椒酒心彌冗忽憶太原老道士破寺呻吟履決踵相携
莫怯北風狂竟訪那愁劣馬要背郭無人與騎罕沿河極
目冰雪壅巉巉削比鵝卵圓紛紛飄作鶴毛毳枯杉榦秃
偃槎枿小屋籬傾藏關茸寒磨驀澗豎尾竄野鼠穴牆戴
頭竦弄袖晴絲漸妍暝拂面烟光通德潁側帽眺覽歷歷
峯揚鞭調笑纍纍冢纒經夕月殿瑤平已見慈雲刹竿聳
入門二客慰且勞冒絮一翁坐而悚苦言疾病關高冷只
訴衰羸腰脚腫拚將瘦骨伴山麋詎有清吟鬪秋葢盛世
偏修聘士儀老夫濫被徵車寵兒扶孫曳還仗誰此事商
山真作侑我聞翁也彊盛時畫地談天氣蠶湧詩篇兀昇

壓并汾義烈崢嶸蓋關隴卽今誰恨驥伏櫪疇昔爭看蠶
出蛹葡萄喫香賽馬漣請翁飲此勿浪恐黃扉燮理盡大
賢上有至尊坐垂拱蒲輪會見送翁歸三關一路春花擁

題惠元龍暨尊公先生令弟小像
元龍北上其尊公賢弟送之出門畫

工爲作此圖

去歲君別家阿翁送出門有弟立翁旁頎然秀而溫瀕行
牽翁衣欲言聲轉吞願翁莫倚閭怕翁雙眼昏赤脚一獠
奴生長田家村驟聞徃帝鄉不覺行步奔吳中有畫師解
抹絳與礬爲君繪此圖託君隨身健京華三千里便可時
翻掀今年君別家秋風敗牆垣阿翁不復見空有斯圖存
長安夜對床軟語接吟卷披圖瀉老淚驟雨忽傾盆我細
觀此圖慘淡筆墨痕一翁園綺徒二子今淵騫翁戴古冠

巾子美瑤瑛現偃僂顧慕間可使薄夫敦空香發絹素兩
手不敢捫語君且勿悲人事難重論請君篋此圖庶用詔
後昆

已未

已未元日同孫豹人毛大可朱錫鬯吳天章喬石林

陳水壑飲曹峨岫寓齋限賦青咸二韻

共作長安客毋爲元日醒多君拋萬事爲我倒雙瓶異國
簪偏盍歡場屐每停屠蘓吾戀汝城柝不須聽

其二

酒闌歌忽起高興若風帆此曲憑誰授斯人果不凡但須
消夜熾切莫羨朝衫惜少織織手呼來撥阮咸

坐上大
可度曲

送同年李子德終養還秦中

金商肅初秋涼颼蕩游氛荒塗趨兔兔曠野啣驚麋之子
離京邑駕言邁西秦傾都耀冠蓋祖餞瀾通津矧我同門
友歡愛尤所敦念當翻飛日曠恨懷其羣黃葉落長安飄
颿辭本根天風一汝送仍墮灞涯濱人生戀鄉土疇不思
仁親欵欵臨岐言惻惻難重陳

其二

晶晶明星祠森森巨靈掌峩峩玉井蓮花開百餘丈關河
旣雄拔人物更倣儻李君起西陲才氣固無兩生當千載
餘氣冠萬夫上蒸爲礪礪辭精緊不流宕咸陽一布衣光
價庇吾黨終期老巖阿誰甘受塵塊做帚大難料時或干
金饗典朝欵求賢輶車徧林莽

其三

君家病老母獨子無餘丁兒出母目盲兒歸母眼明君從
發秦州以暨官上京時將孺子泣激爲烈士爭百試百不
憐崩迫開其誠詭詞託告密屏語疑論兵潛身百僚底喘
息伏殿廷小臣實惜昧濟則君之靈須臾聞闔開 詔遂
烏烏情祥騰一披拂天日爲光晶

其四

我朝體羣臣樹業甚宏達吾

皇敦人倫寰宇徧煦洙君親詎二理忠孝原合轍君歸溫
清暇時事定所切秦關逼巴棧頻歲高戰骨至今兆隴間
土花尚疑血君其臥西州調護諸豪傑聶政僅鼓刀許身
因母決男兒管樂儔寧惟效明哲努力崇前修虛聲仗君
雪

送葉慕廬歸黃州

西風滿長安落葉那堪數隔牆青梧桐又復滴新雨秋雨
不肯絕秋懷難自持楚客昨有信告我還山期猿聲夾岫
聞樹影和烟沒君上洞庭船定望中秋月曾爲緱氏宰只
聽嵩陽鐘一官成汗漫萬事還踈慵京華聚散渾無據愁
君又上黃州去赤壁山前古戰場從來烏鵲南飛處我亦
江湖慣隱淪朝衫偶着每嫌身聊將拄笏微吟意送爾張
帆挾柁人

學士項眉山先生有子甫十四齡姿性秀發卽席能

射覆屈坐上客歌以贈之

武林學士麟州客談經說史螭頭切文宗昌黎起八代筆
扛鼠鼠纏珠鞘門牆奔走籍湜葦瘦餓不唾賀與郊膝前

瓊樹總擎攫一一欲向青雲捎驥子十四更軒豁勢若鷗
鶻追鳴髀長安獻歲晴色動御河解泮層冰膠先生緩帶
甫下直入夜爲我開春庖霏霏斫鱠急雪亂溜溜壓蔗真
珠拋江艇忽送鄉味至天目綠筍供煎炮堆盤釘案更何
有塘棲橘柚新解包此時飲酣沸笑噓且使射覆停譁呶
四筵隸事燭將滅兩陣鬪智鋒初交窶藪爭看舍人窘咩
牙或受東方嘲英英驥子獨敏捷猛氣欲刷東西嶠獸肥
草淺一出手何物足以當弓弮繞床喝雉必先着應弦洞
脇憑誰教古來不乏擅夙惠譬彼穀語爭啾啾楊修小時
縱了了所嗟噐量猶斗筭只有君家七歲橐詮釋大道清
羣淆看君才氣正匹敵如豹在藪淵有蛟他年致身位卿
相竒計何必誇居巢我生輪蠢類苦匏老大蓋頭無把茅

縱能說項有何益書傭祇辦撮與鈔君不見鳳雛一身備
五彩下士纂組真蠨蛸

春夜讌集敬和益都夫子原韻

嵯峨黃閣動星辰尺五城南詎比倫夜色九衢燈乍落風
光二月柳將新勾芒近報施春令鄂渚遙看洗戰塵是夜適聞
岳州秦提何幸枯荻逢煖律一宵生意也津津

其二

平生頗慕古人風今夜師門數子同漫說馬還空冀北不
因鱸始憶江東關山入破邊簫競梅杏將花朔雪融潦倒
敢希遭際事願搯鉛槧只從公

寓舍逼近市廛晨夕聞貨賣者譁囂聲援筆漫述

都城浩烟海醜好鮮不納縱能聚光怪頗亦容穢雜城隅

儼老屋柱礎半欹壓督隸亟糞除課僕事春鋪籬腰刈葶
塵墻脚砌蠓蛤拂拭黃紬衾摒擋赤藤夾聊用妥琴書差
堪展巾箠獨苦迫闌闌跬步礙履鞞瓦溝矢沾汚灰洞蹇
蹙踏垣庫屐響厲牖缺市囂匝叫賣尤可憎未曉便呀呷
千聲鬧猩猩百喙一鵝鴨或如隣翁斲震撼到屏榻或如
猛士開洶湧作盟歆或如婦勃谿戟手晉里甲或如婆憂
嚶中夜絮匱乏亦有清而圓婉轉效鴨鵝隔葉語啁啾穿
花啼恰恰前衢吟未了後街行相答風便更分明宵闌倍
鳴邑嗟予耽靜聞遭此劇樽沓爬搔那可耐徑起破門闥
大呼譙市兒若輩太稠選鬻不過救拒販不過鶉鴿籠內
鼠搬薑擔頭羊熟胛汝求極猥細汝材最冗闒費汝涕與
唾聒我夏與臘汝物又些窳詭飾只一霎喙唆眩翁媪誕

謾誤親狎安能張耳輪坐受嗇夫喋市兒羣致語公量大
褊狹不見長安城紅塵眯白恰班張溢輦下坤軸俱摧拉
哆口論滔滔掀唇風颯颯鬻文倚市叫賣賦作標插逢人
不聶嚅於世誰欵洽聽罷謝市兒失笑口難合碎琴洵險
着銜玉寧良法關戶悄無言陳編耿殘蠟

岳州大捷

上於二月二日宣 諭臣民是日大雪敬和 三相國原

韻二首

二月二日急雪飛崇文門外萬人圍爭看北闕騰丹詔快
觀南天洗鐵衣上苑臘前春已動一軍飲至戌方歸壺漿
父老休翹首指日滇南識 主威

其二

洞庭湖煖鷓鴣飛報道平蠻大合圍共藉九霄三相國助
成千載一戎衣金鞭送喜穿花到玉殿承恩帶雪歸何幸
草茅逢盛事願從彩筆播 天威

兩頰行贈邵子湘

我頰冗似緣坡竹汝頰捲若蝟毛磔兩頰意外一握手熟
視無端笑啞啞家鄉流浪不見面見面乃在長安陌感激
聊為肝胆言誰厖互詡文章伯憶昔蘭陵數鄉士董友賤
子結交真莫逆可憐為人好心事拉我談詩妙風格花天
同領百罰杯月地共枕千人石鵝管三更每換吹鴟絃半
燃偏低擘一尺紅衫不自惜直向梓中異魚炙故將惡語
惱蠻腰要使春顛暈微赤邇來踪跡頓錯落當日歡娛太
狼籍晚歲交君才更健出手壓倒羣兒百詞場虎跳或龍

掀筆陣銀鈞兼鐵畫長安雪片大如蓆我今悞作長安客
底事青門淡蕩人也挽馬搥隨老革君家水上幾間閣君
家烟際一區宅畦蔬差足媚盤飧園果粗能餽盤榻噫噉
噉得歸且種東村麥

上閣學李容齋先生

李花第一仙人樹熬火無雙學士街北闕三更歸院燭東
華十里早朝衫紅樓乳燕調笙譜碧海涼蟾躍鏡函臺閣
文章精組織京都詞賦極雕鑿龍文扛鼎才難敵鵬翅摩
空氣不凡掌上夜珠新炤乘風前汗血早驚颿談經入室
皆江鮑把臂傳杯半籍咸識曲更能分雅鄭調羹還許別
酸醎摻搗畫鼓張詩料捉搦蠻韉佐酒監金屈戌搖犀作
押錦檀槽撥玉為嵌高情颯杳排空陣軼興喧逐下水帆

賤子生平真蘗落先生品望最巉崑久淹馬磨愁誰破一
到龍門恨已芟節過上元春藹藹花飛五出雪慘慘柳絲
眠後將成絮桃靨含時漸啟緘更到玉堂爲介壽鳳城煥
翠漲晴巖

送毛亦史游山左

夜來玉戲太漫漫早起開門雪又乾子作急裝何所向我
憑軟語一相寬卽防儉歲低顏面且對窮交罄肺肝滿目
流亡憂不細乾坤去住總艱難

其二

渾河二月已開冰振柂張帆獨未能上國鶯花空汗漫殊
方虵豕尚憑陵聽來街鼓愁千疊望去家山路幾層記否
東臯聯榻夜滿園絲竹半湖燈

送錢塘翁武原同知黃州

御柳官鶯媚遠天金簫玉管醉離筵青春佐郡名方起彩
筆題詩句可傳兩岸野花弦子國五更新月楚人船黃州
爾去應懷古鐵戟消沉又幾年

春又雪次梅耦長韻

早起看山失翠微鳳城一夜作瑤畿空明極望通瓊苑颯
杏時聞響竹扉歡比故交頻聚合愁和鄉夢共飜飛還期
稍待泥乾日與爾春游漾夾衣

雪後贈張爾成先生

千門梅蕊晴春動一夜瓊葩玉戲佳天上張星原列宿人
間樞府本崇階清河第宅雕鞍盛韋曲門庭畫戟排八月
銀河供汗漫千秋金鏡待磨揩華文入直蓮爲炬峻秩分

籓玉作牌綉幃一揆銅雀瓦珠珂仍響濯龍街班齊簪笏
 千官肅調叶笙簧二氣諧玉立朝端推領袖風生間右懾
 椎埋還因吏散呼香茗每喜朋來選菜鮭白月半廊浮白
 墮青春三徑踏青鞋公綠桑梓情偏愜我困泥塗句類俳
 門下況承栖小季花時只擬過高齋欣逢揆覽星文燦喜
 值懸弧鳥韻喈是日赤麟方獻賦是日初八令嗣子做方入禮闈公家玉
 燕早投懷蟠桃正熟瑤池島紅杏旋開御水涯寄語善題
 鸚鵡客來宵重醉鳳凰釵

題石陽山房圖為王咸中賦

誰携一幅石陽畫邀我閒吟石陽詩石陽溪山我舊識往
 往夢中時遇之漁村樵舍雨漠漠藥苗橘刺烟差差稻畦
 積疊鍊師帔芋畝錯置仙人棊憶我從師受經義總角訓

詰研書辭

謂錢吉士先生

師家正缺堯峯鱗連山駭若奔濤馳拋

書飽飯腰脚健手捫蘿葛為遨嬉山下石湖更清泚東風
 吹皺黃玻璃時搖茶艇亂花艇小動菱絲牽釣絲別來光
 景已隔代昔游兔脫疇能追聞君斥買數弓地架屋恰在
 山之陲日煥渚禽啼啄木風輕粉蝶飛入籬鄰人百輩雜
 鹿馳鑿山鏟嶂窮宵曦居人俱以伐石為業雕鑿窈窕作癡瘠剝剔
 彩翠成瑕疵青山笑君顏面鰲君亦調笑青山癡送向高
 墳作羊虎在却正骨蟠龍螭山靈苦君惡嘲弄令汝無故
 來京師京師雪後泥一尺遭我為訴懷鄉悲摩挲更開綠
 板匣出畫視我添嗟谷柳綿漸墮鯨魚覺杏顙欲破流鶯
 知家山大好合歸去看畫詎必真療饑只愁山神要君惱
 亂雲封谷歸難期歸須拜石謝不敏前言戲耳誠當治春

山憐汝迴薄怒重揄秀鬢描修眉娟然流盼一相顧與汝
永好無乖離

東家藹公

將相神仙兩不成枉拋心力可憐生美人老盡燕丹死誰
與荆軻賦定情

題路湘舞詞

玉河新月小於眉正照文窗獨坐時那得蠻鞞紅鶻嘴隔
簾偷拍斷腸詞

其二

草橋杏葉着花初客館墻陰宿酒餘正是一春愁病裏小
詩憑寄路僑如

題桃菊畫幅

霜前瘦菊傲東籬道服黃絕也自宜却爲陶家太枯淡唐
門還立小桃枝

秋涼飲酒詩和益都夫子韻

涼飈颯然來簾幙便飄灑雜花朝暮粧小帙晉唐楷吾徒
嗜曠達詎怕誚狂駃且賡酒德頌暫輟進學解葡萄釀固
佳只惜雙併矮歌長字欹傾八分倩阿買正逢興會豪那
遽腰脚備剗蛟沒溪潭截虎劈巖嶰人生幾兩屐萬累直
須擺杯闌更拇戰洶湧隣墻駭依稀斫陣還甲光耀純錯

宋旣庭孝廉余三十年老友也客歲夏秋間與余先

後被召入都又同下榻廣平夫子寓廬幾一載矣

秋日南歸賦五言古詩二十八韻送之

君夙嗜恬退而余尤嬾惰牽率到長安疲茶誰能那直沽

君落帆督亢余卸馱後先入國門天遣對床卧宵燈耿旅
冤秋閣了吟課時於五夜闌或在百人座分曹擲帽呼聯
袂攝衣坐歡笑無不爲樂事任人作燕山寒氣早十月雪
花大皚皚冰塞川芒芒塵掘堞期門爭道馳鈴卒突街過
溝遭倉父推巷遇游兵邏南人太怵怯北客諂秀懦每於
代馬上愁甚吳船簸況又俱短視兼之腰脚輒脫不慎歷
街行當受顛蹉蛩蛩與距虛相喚復相佐歲月如流波四
節歛焉挫寒消杏靨融煖逗桃腮破秦賦太和門君倡余
則和君文特崎麗珠玉生咳唾如何反見遺遣歸理耘播
家鄉鄧尉峰眉黛連茶磨太湖秋葦平綠淨不容浣樵歸
蓑半村漁散舟千個風窗繪碧鱸烟寺炊紅稗嗟余乃滯
留金門守窮餓浮榮何足多得歸爲君賀

阮亭先生有謝愚山侍讀贈綠雪茶詩翼日余亦贈
先生芥茗壹器侑以此作并索先生再和

先生下僂直兀若棲窮巖朝來肯一吟骨力韓杜兼頻年
固詩壘堅卧在鼓僂綠雪果何狀竟破詩翁緘鴉山固足
珍芥苻應最快棋盤暨廟後淄澠別酸鹹家園四月中此
物綠岬嵌閨人適畏致箬籠黃蠟箬送君秋雨餘谷泉正
垂簾霜蕘快催瀉颯颯騎風帆只取香色嫩底要龍鳳匳
但倩指爪柔捧之出紅襜高人無偏頗揀擇諒所砭請援
綠雪例再吟烏角鹽

送茶次日阮翁語我又得一事乃遲遲不遽出昨始
示我仍疊來韻

溫平君子性閭伉烈士態此茗兼有之味可匹清瀆先生

湖海樓詩集卷六
三
惠立堂
一代豪詩力壓馬戴斫陣架縱橫出山雲鬣鬣饋茶冀得
詩持以詫流輩詎止側弁哦還思畧沾漑日者君語余新
句昨宵裁遙知定吟圓百顆落珠琲連連遣長鬚稱妮日
幾隊瑤華卒未貽兀兀守茶焙譬如傾城人含情惜蛾黛
遲遲春困餘始肯露腰背清晨陡然示快若破積塊狂斟
翠琰乾起舞珊珊碎君詩險更工余才老方退發棠慎勿
啜茗餉行將再

舍弟還商丘憑寄徐孝廉恭士

一別流光五載移昔游歷歷費尋思曾逢夜雨邀僧聽每
爲春燈借馬騎誰遣故人成薄宦聊憑小弟寄新詩縣南
黃葉堆行滿何日幽尋果夙期

其二

侯生謂朝宗去後才人少雅健沉雄汝最能縱使蠅頭難點
勘應呼驥子畧抄膽漫郎逋客吟都徧斷墨零紈訪未曾
若道鴉青書紙貴剡谿還有數枝藤

寄侯六丈叔岱并懷田梁紫

苦憶商丘侯六丈縱然疎放亦天真三年割宅諳余嬾竟
日銜杯任世嗔黃葉村前追撲朔紅薑花下捉鵲鶉寶刀
澁盡苔痕紫垂老憐君氣竟馴

其二

金門羈絆意茫然月黑狂歌白晝眠近日六鰲翻厚地多
時一雁喜晴天碧鱸肥日牽鄉思黃菊開時少俸錢京兆
田郎殊好在相思片語仗君傳

送邑侯張荆山之任

吾邑介宣歙邊幅實狹窘墟烟雜旄旆津筏編茶笋疊嶂
黨青天秀色鬱噫嶙迴環罨畫溪百摺結蛇蚓南山坐上
頭下見紅泉引誰將孔翠奩鑑此雲髻鬢田疇胼手足儒
雅鉢肝腎人蒙官長憐俗並睢於蠶開門放鷺鴨初旭照
畦畛含哺數十年寒暑免灾疾自從軍興後民氣大駭踳
樹樹啼猩廳村村沸蛙鼃昨年解戰船拽絕千牛剗前年
送軍糧十室九室盡今年旱暴疋赤地足悲閔兩沈亦焦
枯厄運到蛟蜃里正亂咬人掉頭類秋隼明知骨髓乾苦
說租庸繁給鈔善卷洞破碎仙人困南箕不簸揚虛名只
堪哂我公今召杜聞言定紆軫激爲危苦辭敢告神明尹
送邵子湘之登州并寄譚舟石太守

我生大言好誌怪耻逐衆口爭嘔啞壯遊恨不東到海蜃

縮偏寒徒搔爬此州相傳大譎詭洪濤百斛蟠龍鯁澄鮮
忽嵌小黑豆此是真臘新羅臙日主祠堆紅破碎之杲山
蠹青麤笔混茫一氣雷雨晦夜半已擲金蝦蟆我坐一官
去不得頭童尾秃翅觶沙誰何男兒極豪橫徑縛短絳挽
馬撾我聞祖洲富仙藥芝茵徃徃霑麈慶君行倘值海市
出定現幢蓋交紛拏爲余一語問徐福別來已久應還家
五百童女果安在可猶顏色嬌如花詩成自覺棘口吻恐
以妄誕遭喧呶登州太守我好友鰓魚對噉開官衙把詩
狂叫定絕倒颯颯驚亂城樓鴉

移居詩爲田綸霞郎中賦卽次原韻

班班蘭蘭薄笨車西曹老子新搬家忽逢柴車塞衢術萬
牛蹙踏喧驚震城門日開跌蕩蕩怪底偏側踰彭衙竹爐

瓦鈔響戛觸亂書破硯堆欹斜葛洪移居絕類此那有水
部官梅花若將此景入圖畫只少鮑姑雙髻鴉先生大策
復何恨我狂尚慣漁陽過但愁秋雨井又塌補天之手煩
女媧

重九前一日喜汪蛟門至集曹峩帽齋同曹升六田

子綸喬石林汪舟次限六月韻

秋簷滴瀝不肯歇街泥漉漉雙髻沒重陰那許洗袍袴積
雨偏令浣鞞鞞堆盤不見大官羊苦被人譏飽糠惹捫壁
惟看畫上鷹持燈只照牆邊蠍故人誰爲送消息昏黑昨
已抵城闕便須趣駕車前騶何用通名鈴下卒同官南曹
老解事夙叱厨娘辦肴核拔得吳姬髻底釵抑鮮蒸狔殊
搢搢京都連月地大震妖青蒼茫纏慧字百僚已說斷嬰

遊三市還聞嚴請謁吾徒不過文字飲來日幸免耐金罰
酒三行後氣益振雞再號時興尤發談詩說劍莽喧厯惡
弄狂譎儼排許男兒貴賤太超忽徃徃送人把節鉞北風
一夜吼新晴獨樹空潭嵌龍窟亟須借馬去登高莫負西
山青滑笏

九日同升六子綸蛟門石林舟次峩眉渭清次耕黑

龍潭登高再疊前韻

白楊風狂啼不歇鐵色古潭龍出沒百年又逢黃菊殘一
笑第少鴉頭鞞男兒饑飽自有命鷺鴨徒然競糟麩已拚
作客慣聞猿却爲得官惟見蠍今晨斷霞頽斑駁稍喜下
繚黃金闕西山晴髻費梳裹小者纔作巨桃核臺前古冢
太瑣碎一半已被狐狸搯只須蹋地弄迴波何必憂天占

怪李九達寇蓋工請謁獨把深杯領百罰李潘二子最後
來眼中之人總英發須臾枯木老鴉叫嚙杏有若相告訐
似言暝色漸蒼茫所嘆流光轉飄忽生前但得花兼酒身
後還憑袞與鉞天風天風吾語汝慎勿簸動蛟龍窟歸來
又報米餅空醉倚高樓閒拄笏

益都夫子九日招登善果寺閣余以先往黑龍潭不

克從游三疊前韻

統統街鼓打剛歇北斗闌干曉星沒誰歟剥啄拉登高徒
跣下床脚不韉牽來檣馬驚老瘦餘響猶聞齧枯麩便從
潭底掣乖龍詎怕崖巔棲毒蠍幸不當樽綠醕空只愁插
髻黃花闕比來生趣最錯莫是日狂遊更倉卒歸知我師
譙寺樓滿繡花糕飴盤核遙聞側聽極痒痒路黑泥深徒

捐捐此寺由來盛香火晝夜祈年并禳李紺寮直與一氣
通琳殿或受羣靈謁已謾當前落帽狂難辭向後添杯罰
篇終陡覺悲歌發綠章誓擬排閭訐一生百事每蹉跌九
日千齡只倏忽安得解組把鉏犁健勝登壇秉鉞靑州
自是沃衍地籠水況號烟霞窟他年綠野倘從公願乞墻
東地十笏

次日益都夫子垂示善果寺登高之作遙和一首

秋霖淙淙大作惡其勢欲平寺中閣新晴頓復洗昏霾冷
翠西山竟如昨一官便是牛馬走萬事真輸種瓜叟已無
硬句押題糕况值清齋禁食酒鈞纂編排詎我長屠沽卜
筮真吾友今年地搖月建西屋瓦時時作牛吼五行之志
天官書此事將毋未會有幸聞修省廟堂上庶免漂流土

木偶陰伏陽愆理或然風狂雨橫災寧久只須精意格龍
蛇何必縻文磔雞狗吾師示我詩一首憶昨凭闌賦重九
強將蚓竅學鸞吟腕弱毫枯難運帚蟹胥雀鮓尚堪把刻
日重游寺牆下三秋晴日卽重陽莫待紛紛籬菊謝

九月十五夜月食紀事

月中妖墓騁雄怪開口齟齬慣嗜嘍攫拏直犯爛銀盤么
麼敢沈琉璃界水輪藥曰吐復吞桂闕蟾宮癘成疥此時
下土蟣蝨臣亦逐羣官下塔拜廟門萬鼓怒霆轟堂口千
燈亂星挂須臾完完碧海東依然滓穢少纖芥爾墓枉自
插齒牙終古金甌幾曾壞饑腸陡作石鼎煎歸路橫遭游
微搯但能嘯喑嚇寒餓何不飛騰守關隘百事都令此輩
妨一吟便覺生平快五更歸卧曲盡床叢菊半畦霜月曬

不眠唧唧鬪寒蛩達曙狂歌吾未憊

九月十七夜同王仲昭毛大可吳志伊汪舟次潘次
耕胡朏明飲馮冒聞躬暨西齋翌日益都夫子用

拙韻作詩見示仍疊前韻

銅槽水蟻瀏不歇渴羗拍浮頭髮沒井中底用投車轄席
上已先脫巾韉汪生老饕殊可怪似欲流涎到麩麩潘生
酒半便放顛謔語螫人作蛇蝎吳生匿笑只温克吃吃口
中生石闕王胡搦戰興更豪顧謂諸君皆勁卒賢主二難
尤愛客悉索釵璫備盤核毛生拍手仰天唱自說不減鶯
喉滑人生窮達關年命往往術家談計字只須白墮霑老
兵那有青蚨媚典謁銀荷的爍蠟炬短翠竿縱橫蝟籌罰
此時我師方偃息四座喧呶莫輕發若言狂態誰爲傳張

口鴟羹能告許極知聚散最飄忽且壘糟丘擁旄鉞頃刻
夜靜天雞鳴叫徹虞淵燭龍窟翠華行且詣郊壇抖擻吾
將具袍笏

題孫愷似孝廉梅汧詞

萬里歸來奪錦袍常將邊曲譜檀槽此聲漫遣燕姬唱留
向沙塲醉舞刀

其二

鞦韆香絃唱徧詞紛紛搓粉滴臙脂時人縱賦柗榴枕難
示孫郎帳下兒

東同年李渭清兼申吃餅之約

滿空黃葉喧秋井颯颯敲窗疑蝶蝻憶昨重九去登高山
東李生最精猛作勢橫牽惡馬騎愛看霜林電光騁間者

濶焉久不見令我憑闌想形影一日李生來打門握手上
階憤不整爲言昨宵吾喪我甲夜沉迷直至丙顛擠猶如
墜岨谷昏黑得毋填坑穽此後重生極偶然當時不死良
天幸對君狂笑君須省身世從來類萍梗千古疾如羊熟
胛一官贅比肩垂瘦只應拚作半生在慎莫徒爲百憂耿
青州麪抵齊紈靚翠甌炊成雪肌冷再買京城早韭芽要
趁秋燈來說餅

題許實夫說篆冊子兼送其歸東臯并呈巢民先生

暨無譽爰及穀梁青若裔承山濤諸游好

獲君說篆文喜躍偃復仰秋蛇雜春蚓蟠結睛苔上此道
首斯邕製綠倉頡創中間崔蔡輩一一丈人行後來騁鐫
鑿波磔只流宕嶠扁法不傳茫然失所向鵠頭歷錄垂豕

腹膨臍脹點畫譌濃纖區分惑邊傍北印前歲登此地昔
人葬恒多秦漢章飛出王侯壙或篆偏將軍或竇大丞相
蛟螭斷鈕鼻缺鬻不成樣爬沙把之歸綠若鏹疊嶂許侯
如此技精緊更跌蕩當其深湛思十事九遺忘及乎興會
酣颯然始一放舞刀如舞槩遣筆如遣將撇捩鷹脫鞴喧
轟鯨跋浪長安秋雨歇繆篆肯予餉爛銅蝕不完破玉瘦
逾旺此時籬菊吐正擬沾涑釀如何忽告歸念茲色惆悵
東臯我昔游不死須仍訪碧脆椒雞羹黃鮮蟬蛤醬桃膏
紅溜匙花露滑凝盃楊枝別來久不審作何狀那能花月
邊再試玲瓏唱君歸見故人歷歷問無恙宵長秋夢多蟋
蟀開衣桁

送汪存庵廣文出都

西風颯香黃茅店獨樹野田遭歲歉此時老友起急裝淅
瀝霜花肌骨砭憶昔交君在鄉井當時握槩爭壇坫毛骨
英英萬馬驚容華灼灼群姬艷酒社分吟陌上花獵徒並
載車中儉倘稱袁伏果何甘若論曹劉真不忝狐白之裘
紅罽韉紛紛萬態若曹僭斯世何人少八駟官今所職仍
鉛槧居無華堂出無僣矍相圃中苜蓿占膳肉空勞掾史
頒俸錢肯向生徒歛君不見易州釀勝葡萄醞灤河鮑鬪
鱸腮驗肥羊硬餅且嚼之一笑須如填坑塹廣文雖冷勿
復愁耿耿爲君倚長劍

錢編修所藏司馬相如古碧玉小印歌

與古碧玉
箭夾同藏

錢侯示我一片玉嫩於落色拳於菱復持底物酷摹畫邊
兒碧眼泓然顛音積之沉檀屑以麝紫綾錦袂纏螭蛟開

緘雜彩恣潰溢觸手一座停譁吹抹秋簷細審視古翠
駁落蝸涎交乃是相如小私印秀若黛滴溪塘坳昔人阿
黑并買得字義佶屈呼聲聲莫嗤犬子絕相類歛忽變化
騰犀葦不鐫小字鑱名姓烏龍怕受當爐嘲我思玉大不
易得出土應藉三重茅當時卓家盛資送王孫嫁女人聲
嬌家僮八百捧奩具此玉或亦克裹包雪膚耽與琴心昵
便着犢鼻寧相拋成都才子最魚雅遠山新寡真娥媚猩
紅小印鈴牘尾長門脫藁紛傳鈔其旁一玉紺綠色衆客
復起爲啾啾詳詢始識古箭決百戰曾刷幽并郊不知出
自何代冢土花古血濃粘膠想其弦響未成響獸樵稀突
山摧跑然疑二物大刺謬烏鼠詎可同其巢不知主人蓄
深意淘洗酸腐須鞭鞘長卿文具太秀儒故借猛氣相煎

炮客聞此論意陸釋說真說贗還陸曉風流相賞固有在
嗟爾所見誠斗筭君不見茂陵金枕亦破壞咸陽璽角無
堅堯其餘斯邕古碑篆一半橫被羣兒敲何如此印足把
弄千年愛惜誰爲教錢侯狂叫忽起舞籬菊正放霜天苞
亟收二物弄入匣不爾惡風怪雨防有天龍捎

讀惠徵士元龍同宋徵士叔邃徐檢討電發潘檢討
次耕侯秀才大年靈祐宮會飲之作和韻寫懷一

首

霜郊細馬挈蠻榼公等於此興不凡更提健筆撲險怪猛
虎背痒摩枯杉昨余羈絆未曾去琳宮遙望青紅嵌安得
幻爲老蝙蝠攫身直上浮圖攖嗟余垂老乃新嫁窘束不
得褰屏簾六宮女伴半嬌橫誰其脫贈茱萸衫獨餘數子

癖痴嗜許擘新蟬圍晴檐那知百事只我誤更覓四美知
誰兼荆溪溪舞浪花白五湖雄長余何謙茶檣酒舍任跌
宕博徒歌叟寧憎嫌千塲斗酒雪風月十面腰鼓箏琶咸
閒邀傖楚劇盤馬醉泥天妍低剝柑顛狂判作半生過茗
芋敢辭千日淹不圖皇天有深意要我宦海嘗酸鹹宵編
青史苦堆塚早朝丹禁愁森嚴易州老春攔液局禁賒每
每標紅籤斜街菊本太瘦細欲摘風枝無二三旁人哈我
出苦語此意先生胡不廉不記頻年訴迤賤夜闌兒女篝
燈談一官底事轉惆悵却於朝市夸林岳我時大笑顧座
客世路佶屈踰左擔烏玄鵠自有本性煎茗何必加薑鹽
一冬臂痛近差減觥船灑灑還能拈來朝續飲亟報我不
爾會遣長鬚覘丹房石鼎倘聯句在道士語吾爲添

益都夫子復用前韻戲作宮怨詩見簡再和一首

六更打罷瑤籤歇鴛鴦瓦上參旗沒西宮閑掃競晨粧隨
例金床傳袴鞵憶昔蛾眉未陪輦妾本貧家飽糠粃綉陌
懷春只畏麗銅餅汲井惟愁竭夜半天寒倚竹邊平明飛
上黃金闕乍憐着籍在天家猶勝他人廝養卒天家誰料
劇淒清計託微瑕思自核未窺皓魄十分圓已報玉京三
度字殿角東頭拜新月玲瓏簾挂珊瑚骨風颺鳳吹度平
陽盛鬢修蛾難伏謁何時月下奉宸游斜抱琵琶訴淪罰
回首牽蘿茅屋底此時萬片寒香發寄語江村姊妹知紅
顏歲月真飄忽生女慎勿嫁侯王生男慎勿把旄鉞從古
金門奉帚人悲同飲馬長城窟妾身自會寫宮愁買賦寧
勞金十笏

桃花流水圖歌爲喬編修石林賦

誰翻十斛臙脂水直瀉半幅冰綃中斑斑碎點蜀錦纈灼灼亂捲江霞烘初疑玉奴霑卯酒臉潮倒暈瓊酥融復訝誰舞鐵如意一夜迸裂珊瑚宮描摹想像總難肖良久纔辨花光紅三村兩村低着水千枝萬枝高映空不知搖櫓者誰子一船盡沒細桃叢兩頭酒枕雜吟卷隔港魚蠻招釣僮踈踈鹿眼織作篷四圍雲水相玲瓏小桃一笑太無賴幾瓣暗逗篷窗中此時靴紋浪未起一簾晴鏡磨青銅家家開門放鵝鴨村女茜裙兒竹弓人無些處俗醇悶地不鳥鹵時和豐世間那便得此境或者真與仙源通橋邊早有鱖魚賣且酌白墮調橙葱酒酣倘欲別村去亟趁船

尾桃花風

秋日貢鷹使者入關接吾友漢槎書兼乞藥物廣平

夫子旣以枸杞地黃二種緘寄余則附寄烏絲詞稿一部仍繫四絕句兼呈衛玉叔

青海竒鷹雪不如貢來都下北風初自憐亦似離鄉客特爲流人寄紙書

其二

緘題藥裹出真顏酒透紅籤淚點斑更仗當歸作屢語金雞竿下盼君還

其三

寄去烏絲十幅多到時飛雪滿蓬婆邊牆詎少如花女好譜新詞馬上歌

其四

殷勤并語長流叔雪窖頻年況鐵衣月底琵琶千帳起聽
他彈罷定思歸

宣城施愚山先生家園有梅數株橫斜閣外今歲四
五月中梅忽吐二枝適孫茆兩鼎甲捷音至無何
復綻二萼則先生侍讀之命又與高檢討同日下
四花前後正與四公第宅相望也同人作詩紀之
余亦殿以五古一章

施園數本梅嵌在水閣背其下麴塵波濛濛鴨頭翠粉苞
纔暗坼香已沸城內花小不勝簪便擬敬亭髻今年四五
月灌木鳴蜩嘒桃無景歛粧杏少胭脂類梅精陡放顛瓊
粟綻網蒂一花值一家歷歷開以四無何四先生前後吉
語至底用卜筮筭居然握符契宣城一畫手乃是都官裔

作圖遠寄將字脚春蠶細余適忝詞垣同官出相示披圖
笑啞啞慙直吐腸胃我聞羅浮姿耿介絕自貴劍俠與飛
仙礪礪不邪媚云何老成人學此兒子氣譬如商山皓爲
人家國計羣公定自佳奚預爾花事徒然浪猜疑良久悟
深意施公骨堅凝峩峩天廟器高茆澹泊人灑脫擺俗膩
孫君雅未識亦不恃門地相看冰雪容共領鹽梅味以茲
燦天葩聊爲兆靈異詎隨槐柳葦森森附權勢不同桃李
花灼灼鬪韶麗花神聆我語一笑迴薄恚敬謝縞衣人前
言吾漫戲

冬日陪益都夫子善果寺看雪

林邊未浣小梅粉盆內全稀金菊芽天公憐我太索寞幻
作玉戲飄瓊葩琤琤漸擬擊銅鉢淅淅暗欲堆銀沙陡然

前被俗腸胃裂眼大叫狂槎枒城隅古寺莽空濶怪藤雜
木紛交加離披遭壓態抑塞偃蹇就縛軀鬢髮此雖蝓屈
未成勢玉龍已覺能盤拏挿天黛閣更颯爽周圍欄楯青
紅紗皇州一望一千里空明浩淼誰攔遮西山乘霧失數
堵荆關粉本誰塗鴉其餘瑤林并晶闕一一糾結蟠春蛇
黃扉燮理我夫子夙耽禪喜精楞伽遠公撥火出薯蕷香
積掃雪煎脂麻土酥甘滑楮雞美肥脆還能鳴頰牙薄羅
輕漫作寒具鈴以猩印鮮如霞此時朱門正行酒錦幃四
面籠琵琶花羔縷切落紅雪那顧後世嘲淫奢何如我曹
淡生活不斟綠蟻惟斟茶須臾解衣趨浴鼓所喜背痒便
搔爬風狂臘雪定爲瑞來年饑窘寧無涯卓錫哂我語狂
停一笑絕倒相輪斜

送宋徵士叔遠歸平陵

我有茅堂瀟湖口與翁里巷遙相連荆溪月悄更鼓順往
徃直落平陵邊水關關外沈一幅滑膩賽却鴉青箋綠帆
一峭九十里轉眼便抵翁門前篙師放溜險堪怕船婦作
歌清可憐一舟舞雪明乍滅萬叢響玉輕而圓瓦塲荻市
早語沸葦花榭葉秋粧鮮我羈京國甫二載家鄉怪事還
喧傳五六月間早已甚火龍赤帝司其權西溪一夜陡龜
坼海濱石燕空熬煎憶昔前朝兩沈涸依稀記是庚辰年
往來水底路交織沙鳥饑啄擔夫肩白頭曝背撫遺事歷
歷話作三條絃當時樵夫拾螺蛤每於缺甃尋釵鈿千春
井竈塌不盡一碁磴碓形都全浪淘蝕杵綠半段潮劈空
牆紅幾甌龍逃犀窺竟何處不逢其狀逢蓀涎蓬萊揚塵

凡幾度嗟余竟再看桑田觀河詎必憂面皺乍可出手摩
金仙人生遇合定有數過眼豪貴同雲烟江南是月梅漸
放翁歸一笑應狂顛伯兄獻歲正五十亟釀臘酒開長筵
吾鄉山水翁所愛得閒定復相周旋只愁頓失兩溪翠昔
時走舸今乘篋人生萬事莽難料古今陵谷能推遷山行
倘見墨離髻戲寄一語翁須鑄墨離莫笑西泐竭泐亦笑
汝寧牢堅安知來歲春水發藻荇不反棲其巔

冬夜同諸子小集慕華平舍人齋頭分韻二首

今晨休沐暇騎馬出尋君幽興忽焉愜空香時一聞水匙
凝兔耳髻几映鵝羣莫信天街柝宵長未便分

其二

內史才偏大吾生路轉迷一官增老瘦萬事仗提携側聽

風將起瀕行月又低夜鳥驚列炬磔磔不成栖

題畫爲尤悔庵賦

家在江南楊柳村笑君只憶水哉軒野夫也住荆溪上時
有春流漫小園

其二

家在江南楊柳村此時風物最消翫老梅未放香生樹野
鴨羣飛響過門

仲冬望夜同諸子侍飲益都夫子堂中翌日夫子作

歌枉示敬和一首

嘈嘈點滴水蟻涼渴羗排雲騰綠章今宵願抵千日長誓
與歡伯無參商印懸何必大如斗塵世松喬亦稀有但祈
美醞不離口不見糟肉更耐久我生本乏廊廟才十年射

獵周侯臺臂鷹上馬去不回翻身大笑雕弓開一朝置網
羅英哲微軀也被朝衫縹道旁那羨征西碣頭上不慣幽
州雪從來棋局似長安熱劫旁敲孰肯寬蕉園藁本墨汁
乾千年青史徒叢殘我師造化在其手從卯揮毫直到酉
百家描畫終覆瓿詎敢與師爭不朽雄雞三號夜漸央獸
爐蠟炬光昌昌玉鈎隔座誰所藏一醉萬態都遺忘

送緯雲三弟同王鶴升邑令暫往山右度歲來春卽

下榻澄江署中

吾弟好大言居恒嚮余話只思汾晉游每恨乾坤隘余則
顧而語身今受人械安能刷羽毛慄疾縱所屆今晨走別
我作裝太狡猶知從賢主人真歷飛狐界余笑有是夫弟
乃償夙債譬如過屠門果得恣啖嘜又如擲鼠盧隨手只

一喝此地壓三邊從來控兩戒太行石厲角王谷岬嶭斷
雲中上黨間是處足遺砦當日三垂岡重關一夫搃鴉兒
破陣還置酒說成敗至今戰士血和蘇凝成董天陰月黑
時此卽騁幽怪風前古蹟多可以發深喟據鞍揮毫霍
若并刀快三晉出紅粧戍削雜袿髻能爲塞上歌慣作男
兒拜對客攬箏琶嘈雜金元派差可寄譌詼還憑豁悲噫
行行指鵝亭一造哦松廨四弟子萬時
爲黎城丞阿萬出相迎烹雌
飯糝稗應爲說老兄宦興居然憊明年二月間片帆逗江
介暫看故園花小脫征衣曬嬌女髮初齊小婦眉如畫嗟
余滯金門沉憂幾時瘥搖筆送還鄉狂踰痒搔疥

京邸歲暮送其白弟暫返梁園卽赴南昌郡幕三首
爾到睢陽郭多應四節除難霑分歲酒差勝寄家書久客

妻孥瘦長貧兄弟踈愁悰翻倒極白髮漫盈梳

其二

侯丈詩篇穩叔徐君格律蒼堪可還騎馬去只爲鬪雞忙
草草傳柑夜勞勞執戟郎相逢應見訊憑爾話行藏

其三

皖口還西上廬峰紫翠偏江聲連故國驛路入新年鐵樹
旌陽宅紅霞賈客船子安吟眺處彩筆至今傳

益都夫子次君冒聞將膺國子學正之命長歌奉贈

次汪舍人韻

岐陽石鼓器怪偉蹟留太學世則無我未手抄兼目擊空
盤硬句追韓蘓羨君臯比擁此地十萬胄子橋門趨鼓也
彭亨屹廡下守闈安用銅駝平鳳毛犀角相門種才調豈

止堪師儒沙堤代築葦平拜今人料與前賢俱只愁攬鏡
白如瓠褒衣不稱君形模入春花發上丁日定有孰肉膳
吾徒

湖海樓詩集卷七

宜興陳維崧其年著

秀水朱彝尊竹垞

吉水李振裕醒齋

崑山徐秉義果亭

江都宗元鼎定九

庚申

弟 維岳緯雲

宗石子萬 參閱

男履端

姪 伊 校

送王仲昭舍人赴蘭陵郡守幕

舍人結髮起吳越麗蒸詎數王僧曇邇來文格倍迺緊蒲
牢哮吼息鐘鐺布衣客歲來獻賦螭坳偕我趨趨譚訝君
健筆獨扛鼎敵若楚漢鏖章邯賦成殿上顏色動凌轢晁
董君誠堪華銜縱列紫薇署奇字尚闕標緬函嗟余駕鈍

翻見用忝竊禁近心彌慚我師相國益都夫子量淵海細流小

水俱包涵沙堤朝罷火城散便呼數子為清談石鼎聯句

杯灑灑藍田別業花粼粼正期促膝守硯北何意掉臂還

江南江南此時梅靨破橫枝眠處溪拖藍或當風日弄妍

煥酒船銜尾搖晴潭村村水柵午抑鮮箇箇烟鉏春種蚶

長安軟紅君眼見對此那不圖抽簪得歸暫卧山水窟竹

兜笋屐聊顛憨縣南況有予季在椒峯萬籤壓架憑幽撥君

行自可致不惡只餘臣朔憂心俛金門索米苦饑餓百態

總非儒者諳臨岐別曲纔一放天風劈裂聲如虺因君轉

憶小兒女春燈故國方傳柑

早春同嚴蓀友倪閣公范秋濤汪舟次喬石林潘次耕過李木庵前輩齋燈下看盆梅卽次原韻四首

故園當此日晴雪果佳哉竟作三年別空辜萬樹開今朝

何意見遠道那能來方法憑傳語明年我定栽

其二

花已全經眼愁仍欲泥誰齋踈疑畫舫屋小類軍持夢入

前村路吟殘半夜詩春燈偏作意不定寫繁枝

其三

愛作花前語驚成客裡身儻非今夜聚真是異鄉人壓笛

消殘臘藏鈎賭老春窗西誰磔格恐已是清晨客有於窗外作畫眉

聲者

其四

步屨從茲熟經過禮數刪甕邊誰主客花底卽家山歷歷

羲皇上悠悠濠濮間莫愁街鼓發携取暗香還

三月朔日朝罷入直史館見御河新水詩以賦之

禁苑泥融軟勝茵今朝霽色一番新黃滋野菜低抽甲綠
漫春塘漸起鱗紙上較量都昔夢時方纂修明史花時惆悵盡官
身浴鳧飛絮行將滿好趁清江理釣緝

清明游萬柳堂

早聽鈞輶在柳條似聞門外客相邀春來總被微官悞老
至真須濁酒澆十里燕泥晴上冢一城飭擔晚吹簫焙茶
挑笋家園夢不見隣翁隔水招

春抄同諸子飲刺梅園古松下

晨興思出游茫然惑所向或云刺梅園景物頗蕭曠入門
苔色淨到眼雜花放杯來互沉吟興劇迭歌唱兩年縛朝
衫小心事卿相同袍四五人各各色惆悵春山未得歸遇

酒且跌宕君看落紅堆下有昔人葬及今不作達後此欲
誰望老松無賴極橫若攪挈狀我時倚酒豪竟上騎其項
龍鱗陡相噴鼓作天風浪

春暮雜憶八首和彭羨門韻

愛向閒中度歲華鋤梅刪竹作生涯如今門鎖空村裏落
盡東風苦棟花

其二

渚鳥汀花各自愁清江一別兩經秋東皇枉費無邊綠搓
得溪痕似鴨頭

其三

最惹思量穀雨時輕陰薄靄總相宜綠窗小袖煎新芥除
却荆南更數誰

其四

菜花橋在月城西十里鵝黃一剪齊吟到將成何處寫短
牆春店恰新泥

其五

魷魚燕笋入清和風捲街南戲鼓多一霎看場排楚漢千
年陳蹟蘚成窩

其六

善權怪石一叢叢紅賽桃花綠勝桐作底洞門遭劈裂夜
來雷火在其中

其七

玉樹亭亭寺角頭堆綃疊雪影悠悠花時僧訝人歸晚每
到斜陽便倚樓

其八

青史紛紛事可憐古今賢達總成烟草堂舊靠銅峰下箋
就山經是幾年

題畫蘭

三尺冰綃寫楚辭烟條露萼幾千枝滿山蕙草多於箭記
在家鄉穀雨時

寒食友人齋頭梅始花

昨夜棟花風大起一枝梅萼尚鮮新好扶寒食惜騰醉細
認疎籬澹岩人別久已拚辜夙約開遲猶得泥殘春孤踪
合與高齋近老逐羣芳怕見嗔

寄黃黎洲先生求爲先人誌墓

甲乙之際盜竊柄國事稠濁由諸闈刊章告密滿天下劫

火烈烈崑岡炎忠端骨鯁寘牢戶少保強項遭髡鉗三朝
要典是何語爾曹病熱徒狂譎膺滂之後愛名節翁與吾
父均酸醜忠泉出井已清冽孝笋拔地偏修織東都壇墀
立名字西園邱閣紛袿襜懷寧乳贖老逾怒矯尾直拂鐘
山巖我師秋浦魁壘士便樹頤頰張鬚顛一呼袒裼暴猛
獸筆陣霍若霜鋒銛甬東陽羨迭相和摩旌掉鞅交無嫌
四十年來市朝換曜靈急景奔驚颿崇文門外黨碑倒沙
石磨治涖紋嵌平生先子膠漆友半作黃葉經秋芟晨星
落落只翁在開元軼事餘誰譜先朝鈞黨有本末冰玉碣
畧秋陽暹今人往往咎過激毋乃醜正叢譏譚嗚呼吾父
沒已久墓門鬱鬱愁松杉累翁一片道旁碣請放硬筆爲
雕鐫

壽冒巢民先生七十

先生庚子屆五袞我適來捧金屈卮婁東作序字梳大研
繚綾上蟠蛟螭十年庚戌再祝嘏合肥夫子爲之詞花前
秃筆掃屏幃酒痕墨瀋交淋漓今春庚申又七十佳郎睹
着班嬾嬉先生臨觴忽不御無限往事纏心脾風流文采
竟誰是二老一去還無期何人話得老夫事只有陽羨粗
能爲嗟予壯歲病狂易花顛詩癖誠難鑿東臯一住竟十
載僮僕怪詫妻孥嗤當時情事最碎瑣大半已逐烟雲漸
別來霑醉一棖觸十二七八勞追維君園記是號水繪水
色淺鬪佳人眉每逢風日弄妍煖便載香茗搖漣漪綠窗
小榻褚歐帖翠几錯列商周彝酒憐雪後熟偏早客怕花
前來小遲此間萬事絕稱意卽論舖歡還相宜鮮香花露

漬粧妝肥滑蕤荷煎蛤蜊當筵忽憶平生時老顛戟手張
兩頤曾經倚醉忤丞相幾徧束身歸有司搖手真愁京貫
怒撩鬚都爲膺滂危至今名姓有人說不信請驗東京碑
君家樂部更姚冶滿堂箏板花參差倚闌十面腰鼓闌白
雨點罷春霆隨喚來淘洗半生恨聽去打散前朝悲此時
竹肉最切眇向後烏兔頻推移沙經搏手歛然散電遇瞥
眼誰能追我今遭際本意外一身甘受朝衫羈空餘東臯
諸巷陌歷歷秋燈時夢之隔歲先生寄一紙行楷瘦硬縈
蛛絲上言子已得官爵別久脫復將余思下言臯俗子眼
見老夫况復年來哀田園斥盡歌舞罷賓客謝絕亭臺歎
我知先生固達者一語亦復因風馳雖然百事不如昔鉢
池尚浸青玻璃入春三月池水漲小桃亂放紅蘸脂插花

獻竿者誰子此是紅閨雙畫師

先生有兩姬
人善丹青

送錢編修越江暫假還松江

戎葵昌歎好天氣街南榨酒聲淙淙此時錢君興抖擻築
壘要受糟丘降絕嫌蓮子蓋細瑣酷愛鴟羹腹胫肛每當
下直便走詣酒徒滿座人語哢如泥張目百不省間出囁
語相撞春晨何顏色頓索寞喀喀不飲歆凭窗且言病徬
已得請來日便趨東吳艤茲言堪訝定予戲君力本足摧
崆嶺何哉二豎得君侮或者酒渴思烟江君言此事大不
爾家有垂白形敦龐自從入官子別母如形辭影子不雙
我今一舸泝流去官河放溜船鼓逢子魚通印賽豬鴨香
榻撲鼻欺蘭芷江鄉甘膺幸不乏秋至况復堪耘耰我聆
斯言起溪敬至性尤足覘爲邦男兒作事貴果決全藉胆

力相扶扛獨愁同官漸星散且覓酒庫賒開缸君雖止飲
強盡此腥盤獨惜無羊羶

書少司寇馮再來先生冊子三首

友有徐竹逸縣南葺別業鴨欄頗明淨茶臼殊妥帖相隔
不一巷杖屨每相接一日秋雨餘殘陽射城堞乾鵲噪不
休開門見長鬣乍獲滇游紀歡笑已在屬牂牁荒若夢開
卷恍親涉蠻花與犵鳥諱謔在譜牒自後昆明池大有黑
灰劫弄書巾箱中莫令寒具浥

五年前在竹逸齋中
曾讀先生滇游紀

其二

小儒罕睹記握筆徒蹒跚猥蒙曠代典擢職居史官勝國
煨燼後館庫多叢殘編排固不易鈔撮亦大難公篡叛賊

傳體核氣力完變態遭刻畫博枕愁離剗明季素其綱連

營蠱盤盤遂令躑躅輩晝夜舖人肝公文著殷鑒犀銳誰
能干安得請他作畫爲陳金鑾

先生有李自成
張獻忠二傳

其三

生平困馬磨薄業託雞距矻矻把一編忽忽昧寒暑每遭
塵累牽突若胸撞杵所以與世間一往輒齟齬公立百僚
上豁達更軒舉憐才根至性鉅細靡不苟恒思掃公門祇
爲毒熱阻祝融秉烈火燔灼麥與黍園官菜把枯稀疏到
萬苴同官有錢子

謂庸
亭

喚我就公語稍待微涼生瓦溝響

新雨

送周翼微入蜀

餅中易酒蜜樣甜溝邊柳花墮滿檐都城久住竟何好此
豈有物相膠黏鯊魚薺菜不得吃肥羊硬餅增人嫌捲連

枉突壯夫髯蝟磔虛負參軍額今君踈踈走別我欲上劍
閣行左擔我聞此路最險仄水饒虺蝮林驅虺國門旣出
歸亦得奚事更作軍裝嚴將鬚顧我笑脫幘守雌屈夔誠
何堪下牀動足卽萬里詎着舞鞵鴉頭織況今兩川報殺
賊已闢郡縣通滇黔渝歌賤錢大歡暢氏王祚長遭俘殲
男兒去作鷺鳥發龜筮祇許庸奴占愛君不學兒女態憑
君且挂巴江帆三秋定過青衣渡一曲還歌烏角鹽

送史省齋觀察充東

昔君校士赴梁宋迴風羽葆霏毳望我適饑驅在君幕黃
皮作袴腰鞭撾當時賓從滿君後君也於我禮有加感君
恕我最脫畧荷君信我無陂邪猶記殘年阻榮澤橫飛雪
片粗於鴉人馬同時負水立水亦漸釋聲沙沙屬邀天幸

乃得渡擬出一語膠其牙徐呼煖酒迭相賀我自起搯
箏琶歌闌愀然翻迸淚蹙若猛士聞邊笳兩九日月大難
料一往梭擲踰奔虵別君倏忽一十載余忝館職官京華
君亦需次傍輦轂一握笑語宵燈譁詞垣冷署世所唾君
獨見嗜如瘡痂東風落到馭娒館意欲漸放長安花風光
正好君又別夕陽亭下誰攔遮人生作官要濟物不爾受
祿何爲邪慚予媿媿潤鉛槧魯魚亥豕徒紛拏孔陵蒼檜
拘積鐵穹碑宰木高齷齪我生結髮未一到東瞻闕里長
咨嗟夢中髣髴從君事飛鞚轆轤涼月斜

送子萬弟還黎城署

小弟朝來別我行正逢京國逼清明一鞭晚宿臨洛驛三
月人歸上黨城遠道夢隨春水濶微官裝抵柳花輕阿兄

索米尤堪晒可及哦松格調清

送家北山別駕之任南陽

出餞意彌傷藉卉談差快宛葉記昔游月黑陰風大馬頭
光武井草際赤眉若博望驛荒唐寇軍城破壞炎精昔中
燼帝紐珠囊解誰何踞漸臺只攫鯁魚噉此間文叔起一
戰驅百怪四七識豪雄其人半無賴皇天有平陂厚地迭
成敗云何猛士去空自賸關隘從來戰血多往往繡成薑
今君宦此地吟興將毋憊惟當慎噢咻切勿苦凋瘵城南
卧龍岡老栢大無外堂堂諸葛公古宅迄今在君當過其
祠整肅冠巾拜鄧州出彭五彭孝廉始博文彩縱橫灑使筆疾
如風舞槩何能逮君如見此人莫令信伍噲我職忝編排
屹屹安能耐君官在收養勉矣行自愛商於鬱壁哦白水

喧澎湃揮手盡片言相期各征邁

送古燈上人還嘉禾

禪師行脚來潭柘兩見緋桃潑眼紅亟打腰包返山寺爲
防園笋要成叢

書南來僧冊子

斑斑小雨漸成泥滿樹丁香幾簇齊恰值朝回無一事閒
書梵夾綠窗西

其二

九龍山下水泉香乞食何緣入帝鄉豆綠櫻紅時節好勸
師南去學休糧

送勞書升前輩觀察貴竹

東吳惠生元龍樹志節評騰朝士精而嚴說侯顧獨感次骨

語未離吻中爲霑生言昔者歲在卯江東文戰侯所監此
邦文體近最劣如蝮如志何奄奄侯來長劍快入手關冗
誓擬加鉏芟區分美疢百不爽秋水鑒澈新陽暹當時讀
生溪穩作欲量字數酬其嫌不知誰何巧排竿疑有鬼物
相訶讒感恩詎問得與喪侯對我友寧懷慚我生恨未識
侯面昨者剝啄尋精藍入門老樹百圍古天風吼動松針
尖見侯意氣便踈豁恕我禮法無拘牽今年王師大拓地
已闢梁益平滇黔侯時適合選人格擁傳直落天西南今
人值選預恒怯日費雞卜煩龜占之官道里稍遼遠屢顧
妻子愁詹詹况聞貴筑罕晴旭四無所覩惟頑嵐呶囁旄
牛口呀呷蹙踏苴馬軀髻髮旁人乍聽色潛動侯也寂若
神逾恬東西南北總王事蠻天瘴海臣能堪丈夫天下地志

萬里盤錯正見千將銛王尊此馭前事在驅之勿復愁朱
炎惠生袖出竹膜紙邀我作詩同一函送侯借別話未已
飛鞚歛作風中帆

送蔣芳萼觀察八閩

丈夫作事貴颯爽乘興要駕龜鼉梁江河不設一杯水須
跨碧海凌蒼茫綿延八閩海包絡夜色徃徃連珠洋勢雄
氣盛百怪出砰礚天地聲雷碾頻年孫恩弄船艦圖逞螳
臂翻鱗堂天戈一揮紫颶息鱷魚遠徙鯨鯢僵輕軍繫得
百濮長下瀨縛取滇池王先生觀察適此日油幢繡葆紛
飄颺開城月下饗將士伐鼓水上椎牛羊捷書早獻未央
殿佇見勲業垂旂常嗟予金門苦索米一官捐捐愁鉛黃
海天竒秀不挂眼敢望髭髮升扶桑飽聞離支入夏熟干

樹萬樹朱砂囊何由便趁鸞帆去蛟宮蜃市同翱翔臨風
快擘三百顆一洗腐儒蒸菟腸

送惠元龍南歸

一城吹角聲嗚咽不肯住雜以雨霏霏颯杳空庭樹心知
又及秋身世關百慮況我同袍友作裝抑何遽正復攪離
憂如夢魘難寤我生蒸菟腸鮮腆匪所慕三載溷長安蹙
蹙烏在笈平明開九門嗚呼盛統禱期門羽林兒肥者白
如瓠青絲絡馬頭揮鞭有餘怒搯人狹巷間偏仄不使度
問爾何官職視爾瘦行步良久得官名執手抑揄去爾曹
在世上窮薄天所賦歸來色死灰悽哽仗誰訴隔牆吾子
在高論豁蒙霧賴此破羈愁宵燈翳復吐君身雖短小志
畧絕魁梧蟲魚辨毫芒去去正迷誤居恒陋儒師勉見拘

箋注役使于古人毋乃類傭雇獨抒雅健思切作攫擊句
通又憤時艱觸口肝胆露撫摹韓杜體飛動論世務激爲
危苦詞刺彼閭閻蠹臨軒倘採風此足備掌故吾生百不
遂萬事莽迴互惟堪手一編與子共晨暮何期南歸雁歛
忽不我顧憂來捉鼻吟狂極大聲呼空蒼祖氏園都城最
佳處鞞紋翠乍接荷錢綠新鑄羣公昨置餞邀我未遑赴
實因病兼旬疲曳到腰胯寫意成此篇譴謔叙情悽詩成
雨淙淙秋簷復如注

送梅耦長還宛陵

宛陵都官不在世幾疑千古無風騷後來才子亦輩有梅
氏劍出詩中豪瞿劭先生耦長尊公我父執聯篇脫瀉如
奔濤歲之丁丑我乎館二老翰墨供盤教我家東樓極幽

靚干竿冷翠攢篔簹晴窗鬆几蠻蘭滑竹風沸與歌聲塵
客堂春杪鼠姑放千朵萬朵爭低高渴羗立盡百壺酒膳
宰更斲猪羊膳我時最小記此景至今畧說心煩勿風光
一去四十載昔賢文彩埋黃蒿石闌半壞鼠枯死看花人
亦誰堅牢羨君幼便露頭角肩吾有信乘有臯邇來蒼硬
更無匹抵突屈宋凌雄褒我曾一訪天逸閣君喜酌我松
花醪籠燈添酒木葉響冷屋話舊翻嘈嘈男兒墮地若風
絮簾櫳籓溷憑相遭兩年燕市忽合併白髮怕對紅粧搔
都城百事君所見刮龜背愁無毛園官送菜苦酸澁三
日博得一冷淘我今骨相耐貧薄空倉饑雀拚替替君才
猛銳必自掣爪觜肯受黃金條麻姑敬亭好岡阜起伏一
帶連雕尻君歸山下掃綠雪慎勿雜用脂麻熬得聞出溪

弄秋水蜻蛉絕小身能撻還鄉之樂樂無限此外萬種皆
秋毫西風獵獵吹枯塚齷其惡馬嘶空槽梅君飲半出城
去腰下笑看龍雀刀

送侯大年還膠

庭中老槐樹樹葉頗纂纂秋風一何多欲脫詎能嬾五更
獨客枕萬事到來滿所藉二三子過存極惻款如何烟際
檣裝盡還鄉伴從茲剝啄聲後定吳音罕

其二

昨歲火龍怒焦盡江淮田今年水怪橫轟虺瀉長川嗟哉
此邦人頻歲愁顛連五行迭相厄互復司其權君歸認井
竈或在洲渚邊闔門看葦花移牀上釣船

其三

君家尹綠樓簾檻儼圖畫縱橫幾畝桂窟宅此樓下霜前
黃一城月底香十舍不知遭滂沱仍否花低亞花亦何足
道所急在米價男兒苦饑餓去住總悲吒

送田綸霞督學江南

昨秋九月菊蕊放羣公招我來登高風流京兆騎馬至滿
貯蠻榼堆花餽黑龍潭上架小閣夜夜龍吼安能牢白楊
離披不曉事晚更助以聲颺颺我輩渴筆寫長句兀界欲
與天風鏖君詩跌宕倍深警陵轅韓杜驅雄褒是日轟轟
大笑樂颯如猛吹翻旌旄龍亦爲之徙其窟雁亦爲之求
其曹景光歛忽搏手散昔游滅沒寧重遭虞衡即官久於
事日對掾史談錢刀今年護軍大破賊強藩逆節平其壕
破除兵氣使不律此事只有君能熱江東生徒素魚雅橋

門鶴立環青袍底須要作八州督帳前勇士插虎毛吾鄉
秀民古傳說通經務擬窮織毫邇來詩書遂墻壁惟有百
慮相煎熬頗聞亟藉膚寸渥未可純用耨耙薈此是廬陵
夙所辦鄙言媿媿徒喧呶西風牛渚鱗甲動巨扁真壓秋
江濤關河六代晴歷歷眼前儘足供君豪祇愁京國客將
老獨向乾坤首重搔重陽再上龍潭望人在江東擘蠓螯

送彭古晉之尉氏并懷盧文子

五茸城外花草香我曾會獵來其鄉彭生盧生正年少其
餘悉在崔蔡行每逢高燕騁雄俊角鷹刷翅森開張揮毫
一掃一千紙鸞蹲獅跛蛟螭僵吳淞女兒斫繪手細切玉
雪調慈薑當筵見此色愀愴是何上客殊非常別經三載
輒一見見則必在鍾山陽南朝車騎色光麗北府賓從姿

軒昂江邊秋月一片白
往往酹酒呼周郎此後聚散大難
料男兒虎鼠焉能量愁予顏面日衰醜君亦頗覺鬚眉蒼
崇文街上莽相遇柴車十丈沙塵颺我時竊祿更寒餓爾
縱困憊誰扶將長安客子習嬾耍稱妮跼屣登高堂君獨
彊直喜自遂然實洞豁無他腸貴游妄意君善詈預勅典
謁為淡藏出門俛俛竟何詣蒲桃釀熟何由嘗灤河八月
秋氣動君忽跨馬作急裝告予將適尉氏縣乘輿一上三
亭岡此間阮公舊鄉里山川蒼莽風雷硯君今休作廣武
歎若輩恐復嗔君狂并煩作書報盧子昔游歷歷真難忘

贈周舍人履坦兼送其南歸

曾鯨去遠老蓮老後來畫者祗皮相國朝好手誰第一吳
下周生最跌踴風神淡施體蔚跂筆筆適緊不流宕同時

若遇曹不興把臂定應折輩行其他紛紛越姿媚詎中為
君作廝養前年布衣竟召見徒步直入含元仗 聖人正
坐乾清門御榻銅輿屹相向紫殿深沉景物閒黃綾滑膩
神情旺 詔寫三班學士容兼圖百戰功臣像此時舐墨
玉墀下欲落不落色惆悵良久躊躇筆興顛颯然健鶻空
中放 九重微笑真宰愁元氣淋漓滿屏幃餘者翎毛雜
花卉也復烘染窮形狀湘竹真令倚廟斜角鷹會遣翻鞞
上昨朝並轡早朝罷手提束絹遽來訪憐我嶮嶮歷落人
亟圖一幅把予餉嗟余形貌實闕冗每被時流惡譏謗或
謔諸毛繞涿居或嗤修竹綠坡長李家衮師走跋踈亦思
捉搦張飛樣何期妙筆一縱橫其訝微軀竟侷儻矧君設
色有天趣規檢經營勞意匠藤几桐窗最靜便笛牀茗椀

何精當吾生志氣本疎豁富貴區區非所望每虞鈍筆苦
描畫爾曹用意太孟浪何如置我丘壑間俾我談諧忽焉
暢江東秋水綠新釀君去延緣弄菰蔣來年我亦摘船歸
此語硜硜詎君誑

題梅淵公畫松爲愚山先生賦

施侯沃我以綠雪不數壑源鷹爪竒啜餘示我一幅畫長
松十丈紛離披牙鬚蚴蟉猛兕跳鱗鬣蹙踏蒼龍馳抹膠
詢問誰所作乃克肖此形支離答言栢規一詩老兩手慣
放枯松枝五日十日畫一本波濤春激颺颺悲昨蒙攜畫
脫相贈令我久看忘饑疲子之作詩興頗旺亦如此翁作
畫時請爲拘筆寫長句配此禿榦蒼茫姿嗟乎吾家松樹
老無比二年偃蹇空園底何時乘去去組理矮茅簷下拾

松子不爾攬身入畫裡

老栢行爲房慎庵比部賦

房公墓前幾株栢硬者虬鬚瘦虎脊攫拏橫作百千丈卷
曲短纔三兩尺蒙叢色使白日暗偏強勢與蒼旻迫將毋
太離披或者狂戲劇我聞房公家乃近好時之旁長安之
陌地多秦漢冢不數侯王宅隴頭翁仲缺破碎水上銅盤
莽傾圻何況草木之壽非金石樗里墳東合抱樹徃徃夜
遭雷火劈上林園中千品果一半付與行人摘獨有此栢
青峩峩千年萬年攢劍戟洞腹寧憂蛇蝮盤枯根不受狐
狸嚇乃知扶輿磅礴有本性一任終南太乙雪霜積吁嗟
乎房公墓前幾株栢

題吳門曹生小像

腹尺皤然似瓠壺
詠諧任俠走江湖
朱門食客休相笑
容得如卿幾輩無

秋曉東李渭清

樹杪露殘月因之啟戶
看炤來君定瘦
望去夜初寒
馳褐他鄉薄
豨苓儉歲難
生涯那易遂
俛首愧微官

八月三十日

賜藕恭紀

霽旭升黃屋
風潭敞碧城

君王臨水殿
曉色冷蓬瀛
鳳舸遵遙瀨
龍堂擢秀莖
低奉波碎濺
小摘蔓斜縈
堆去銀灣滿
攜來玉臂輕
早涼侵素柰
內熟笈朱櫻
爽便寒鋸削
鮮宜雪枕擎
迴鑿纔北渚
懷果徧西清
是日歡尤劇
移時感倍盈
多年遭汨沒

荷生成詎料淤泥質
終承採掇榮
孤芳長襲襲
晚節信硜硜
夔夔世蓮臺
種他年華頂行
皇都霑杏酪
澤國想蓴羹
折罷綵還在拋殘
菂又生歌魚欣
藻密向日效葵傾
節值今秋閨宵憐
晦日晴恩光
渾不夜
萬里總瑤京

閩中秋

漱灑金波影
新纔到枕邊
閩還逢此夜
圓不待明年
兩度冰輪皎
三更皓彩鮮
授衣期暫緩
隣杵莫頻傳

其二

客歲中秋事
回頭感尚新
倉皇連萬戶
搖蕩竟連旬
杳杳霓裳曲
淒淒逆旅身
清光偏有意
閩月倍還人

咏盆桂次益都夫子韻

未看愁先破
將開蕊尚含
一枝來薊北
萬樹憶荆南
黃雪

漫天下青鞋映水探三年稀見汝細酌不成酣

壽王阮亭先生 先生以甲戌閏八月生至今歲始值再閏已四十七年矣

焉逢掩茂歲秋仲月維閏新城賀克閏千齡此發軔於菟
墮地辰趨若月中魏秋氣倍清剛詞場獲雄雉我常推冀
英閏月亦以物只有兩中秋故老頗云僅今茲月重光恰
踐江潮信四十有七年雙丸去何迅馮生異貞脆物性別
堅韌惟有巖畔松不類園中薜我持菊花酒為酌王子晉
十見閏中秋蒼蒼仍在鬢

咏翰林院中古蹟次尤悔庵韻

黃帕低籠雪藕寒 九重分賜徧長安 時以賜藕入院 滌來院吏

尋冰井踏處牆陰觸石欄瑟瑟銅瓶苔影薄涓涓碧斃葉

聲乾玉堂舊事知何限欲溯風流想像難

其二

瀛洲誰料尚能來藥院荷潭面面開聞說前朝柯學士種
將雙樹傍空臺蒼皮繡甲參天質嘯雨呼風不世才為撫
茶陵遺墨在索鈴掣罷首重囿 右咏柯亭

題虞山友人種菊圖 程孟陽甥

前朝詞客松圓老粉墨凋零實可嗟賴有賢甥能似舅半
間茅屋一園花

其二

畫師不見黃公望煥翠晴嵐尚插天何日結隣同種菊溪
鋤對把破山前

九日黑龍潭登高同用九字

霜酣嫩蕊斑滌滅古潭黝年年選此地相將作重九今年

閨中秋節候頗雜糅雖喜得月頻却悞登高久茲辰倍澄
鮮霽旭散原阜潑眼秋景佳招尋況我友十夫昇食器稠
載類束韭滿籃野菊黃紅紫亦多有我時飛鞚到怕落羣
賢後逸興莽滔滔雄談劇糾糾吾生腕有鬼戈法昧運肘
粗比花猪肥畧似春蛇醜脫復不持螯虛生此兩手亟擘
數十枚快意罕所負此時羣蠹厖一醉拚屯守只予慚戶
小飲半跳而走捫摸徧嵌嵌經過閱林藪客秋所坐地依
舊苔紋厚悲臺更龍窠壞壁尚抖擻獨有昨年人屈指少
誰某而我明年來吾徒仍健否人生貴作達萬象總芻狗
唯餘狂孟嘉千載致不朽潭邊鐵色樹劈裂勢逾陡蟻攢
空洞腹免缺豁訝口傾醪笑勸之此亦可以酒

題宋牧仲員外雙江倡和集卽次其集中原韻

君昔射虎蘄黃州虎腥亂濺青貂裘年來不作下莊子慣
從吾曹爲雅游長安十子最籍籍格調妥帖推商丘雙江
一編歛馱幻竒而不詭蒼然幽孟韓相值亦退舍萬牛穀
鯁迴其軛乃識使筆若使弩猛氣一撒誰能留朝士昨聞
槎使到競詢蒟醬和安榴那知蕭然百無贖只有吟卷追
曹劉鬱孤臺下連水驛高檣如薺烟中浮清吟半入黎母
唱一半散作珠娘謳日子捷關擁獨樹壽藤怪蔓纏蒼蚪
配君此編兩踈豁樹根仰讀嗟風流秋晴連日劇無頰野
籬菊葢行將抽何能與汝出城去倒騎烏特西山頭
恭和掌院葉訥庵先生題翰林院壁
次東坡清
虛堂韻
力學當如錐畫沙大呼屈宋直作衙邇來手腕苦孱鈍抹
眈兼苦遭昏花一官正復淡生活此外大有金張家拋書

退院遽曛黑仰面細數投林鴉男兒讀書讀經始義父奇
與毛詩葩其餘蟲魚并亥豕亦須蒐獮爲搔爬頗怪詞林
有成說吾曹故事惟香茶先朝一前輩云吾詞林故事惟香茗耳斯言弁鄙
誓一雪質鴛幸賴相鞭撻且愁古人去我久望而佇立空
煩嗟不見暮年袁伯業志氣煥發凌朝霞

雪後陪益都夫子游祝園敬和原韻四首

誰割龍潭景添成物外栖籬沿仄徑入橋受雜花迷赭館
憑空削蒼杉挾雨啼雛松偏作勢已欲與天齊

其二

前月期吾友朝回信馬過行藏看旅髮身世撫庭柯小別
牽雲壑重游認薜蘿謝公清咏愜容我續狂歌

其三

一夜長安雪真拚酒百盞真懷歸寂歷放眼入虛無員嶠
行將近羣真或可呼他年鯨背上潦倒不須扶

其四

欲去仍餘戀陂塘此最幽官閑耽地僻身老悔名浮隔澗
林霏結斜陽竹影稠歸途渾積雪曛黑莫深愁

祝園看雪長句和韻

九霄遙夜玉鯨奔千門極望蒼皮凍銀刀斫陣只縱鋒霜
鶻摩崖太飛動浮浮乍訝沒軒砌皎皎看平屋棟瓊裝
苑內幾銅仙粉築宮前雙鐵鳳磨成餐餌兆豐登雕作瓊
琳克職貢天公有興莽揮霍風伯無聊劇搏弄醉矣直拚
爛似泥樂哉所得何如仲黃昏踏雪拘珊鞭鐵驪縱滑吾
能控

益都夫子招游王大司馬怡園敬和原韻四首

賴有平泉好能諧吏隱心到門添野興傍市得幽尋日漏
楓栴鬣霜纏薜荔陰喜無塵雜事風裡自鳴琴

其二

細篠戎戎長幽篁泠泠寒客中稀見汝幾日到長安礪砢
存高節颺颺起素湍笋根來歲迸定學蜚龍蟠

怡園
饒竹

其三

憶赴尚書酌霜天酒似澗訐謨關廟社汎愛及賓朋園果
經秋熟山泉向晚澄高臺重上處徙倚記吾曾

前歲司馬
招飲曾游

是園

其四

晚出沙堤上山游謝傅耽振衣凌絕壑把炬認層嵐噴色

千門結霜容萬木酣夜歸歌獨枕端不夢江南

是日夫子
下直最晚

送趙天羽郎中出榷揚州鈔關

雪後千門皓不收送君乘傳下邳溝風帆一片迷瓜步城
角三更到蔣州振枕漫聽囉噴曲算緡真繫度支愁遙知
趙嘏籌時意不爲吟詩只倚樓

其二

纔說江都意倍親平生此地最知津鮑昭舊作蕪城賦杜
牧曾爲載酒人鴉點雷塘秋瑟瑟笛吹板渚水粼粼三年
京國栖遲客官閣梅開又一春

酬贈戴二无忝并送其南歸兼寄務旃次原韻

風謹掣冷燭冰厚裂破硯平明挽馬過送子出京甸吾子
一世豪昂藏路人羨狂餘態儻葛醉後興纏縷憶昔起孤

童奮身歷時彥每拊邯鄲箏恒舞洛陽劍出二晉重耳忍
 詢越勾踐平生觸十死性命賸一線年來賣豎卜誓不弄
 刀箭有屋八九間有史十百卷有兒能販脂有婦工織絹
 山色露墻匡湖光洗門扇奚復入長安車脚恐不賤長安
 牛馬矢累並宜春苑居間輒媚多子又性苦卞此行定底
 急投謁秘書院答言鼎革初先子狗一戰填海海已焦逐
 日日苦晏幸逢修史詔設局移中監先蹟久沉霾倘獲廁
 文獻樹為臣子鵠奉作千秋鑑嗚咽絕辛酸語罷淚交濺
 太息謝故人忠邪久自見況值不諱朝子且還鄉縣總裁
 又大賢庶以慰淒戀不聞有元世亦立文山傳我非遷固
 儔并乏金張援只有一寸心炯炯可以鑒歸行晤汝兄溫
 火莖床薦定憶燕山隅此時雪成片饑朔正衝寒早直懸

麟殿

題文衡山雪景送少司寇高念東先生還緇川

誰鋪硬紙寫急雪雪與水墨交瓏瓏六花初放未全猛漠
 漠灑灑浮長空俄焉風勢拗而怒鞞鞞珠玉紛撞春大寒
 膠雪雪成塊顛崖蹄谷聲窅窅先朝待詔妙濡染價壓董
 巨高關仝先生平生癖此畫與畫并客長安中長安九衢
 盛熏灼赤車丹轂追霜風肩摩臘底汗成雨縱有積雪愁
 消融憶昨朱門鬪豪富強請出畫闕其縱冰姿怕遭寒具
 污傲性詎雜當壚傭發狂神畫興頗旺飛去願作僧繇龍
 先生笑爾妄區別我意囂寂將毋同出山自可歸亦得卷
 汝聊復還山東還時玉花果飄瞥真雪已沒般陽峰心知
 此雪亦戲耳小作狡獪隨天公江東狂奴喙三尺揮手耻

為離別容他年
苾屨到歷下
鄭公祠畔行
追從好開丹竈
一相待雪裏
莫遣巖扉封

竹鼠

贊寧筍譜曰竹根大鼠名竹豚亦名稚子杜詩筍
根稚子是也玉篇曰鼯浙江遂安有之毛子允大
出以佐酒遂成此詩

遂安近歙州郭外水雲白干竿叢篴斲萬個攢劍戟筆竹
暨箨繁尻雕壓肘腋其根有竹豚趨趨善跳擲杜陵詩句
豪稚子見卷册是又一名鼯稗史所攜撫能飛既讓鼯多
技還輸鼯土人慣捕之腊以釘盤膺愛其風調勝別是一
標格肥本類羊牯清又兼筍液我友有毛子邀我夜浮拍
北酒最甘香方物佐行炙我常憎鼠輩發索聲噴噴形軀

絕寢陋情性又狠籍所以於世間只合克肴核邊人飯
狸獠子咀蜜啣兀斯最么膺盡殺亦誰惜爾獨厭塵空爾
獨耽閒適林下號畸人篁中作逋客饑餐藪筍膏渴飲由
衙瀝在已足逍遙與物奚嫌隙如何太常齊亦被張湯磔
乃知饕餮繁頓令蟲豸窄生雖伴竹郎死竟溷鵝跖不如
竄倉庾日啖一斛麥不如穴窶藪離彼鷓雛嚇搬薑任驪
騷拖腸免煎迫求生生轉蹙遠患患偏劇毛子起大笑與
子永今夕且復吃蛤蜊感慨有何益

春朝漫興和尤悔庵同年韻

東風忽漫入今年靜撫流光一惘然曉逐鳴珂霑御氣
是日
侍班暮歸篝火檢殘編土牛陌上驚相問釵燕閨中遠未
傳苦憶畫溪溪畔事討春無日不狂顛

除夕燭下讀阮亭牧仲諸公冬夜聯句卽事戲和其

韻

平生雜傭保托業在畚鍤形容鮮光麗學問遜淹洽一賦
奏殿廷九重給袍帽掾幾三語類官任百僚壓匪緣帖
括進或作優俳狎訑訑面譎詼洵洵背盟軟懦夫畏顛蹶
一步一夔峽眼縱辨魯魚喙敢議禘祫空戴殿頭銜不署
紙尾押當歸浪得名縮地苦無法繁憂甫就芟冗長復成
蕙鄉曲小廉隅婦孺粗檢押宵來客臘盡符換新桃插無
錢過殘年有夢落清雪余家荆溪與雪溪近且打細腰鼓狂歌綠頭
鴨綠頭鴨詞中長調名拍手唱烏烏轉喉吟恰恰人生鬪年命遇酒
直須呷行將抽手板徑卧草鞋夾睡鄉遊無何要路忘某
甲水陸謝舟車寒暄付裘篋底事濁辭章詎若算鹽筴五

更風裂燭四壁鼠撼篋已拚蛇蚓體蟠滿菖蒲劄感激在
心脾飛動伸臂胛明當典春衣飲伴未云乏

湖海樓詩集卷八

宜興陳維崧其年著

景州張 衡晴峯

新城王士禛阮亭

選

崑山徐乾學健菴

男履端

錢塘毛 駉馳黃

姪 伊 校

辛酉

元旦早朝

捲盡宮鴉翠輦過干官虎拜溢鸞坡未央日上黃初映太
液風來綠始波歲紀重光連作鄂辛為重光西為作鄂天開越雋繞
牂牁時王師已渡真南鐵索橋詞臣願進平南頌競托隃糜盾鼻磨

人日李公凱招飲同用人字

獻歲韶光漸及旬喜逢令節又稱人灤河抑鮓疑通丙蠻
榼堆盤穩受辛薄宦直拚千日醉前遊終憶五湖濱參差
火樹來宵發與爾狂歌趁好春

春夜朱錫鬯陸義山兩君招飲饌甚甘腴一飽之後
快然成詩得二十四韻

女几幸敬之才高多觸誤一語最可悲平生飽有數每逢
李欽與元裕之輒爲盛張具得食便津津識量誠卑污將毋
舖歎流詎免老饕賦我生本貧薄然不耐蔬素南人僑北
地食性兩相忤硬餅累齧齶官羊招噦嘔時時冀填倉頓
頓怕蒸瓠朝來食指動心莫省其故果得我友信奔躓不
遑屢入門脫帽狂由竇大聲呼萊雞抹作織濃賽甕頭乳
軒切關東鵝嫩極不勝箸椒豉糝蛙麻橙薑醢雉兔尤精

花豬肉純用瓊花露酒名載非僕射單韋弘源僕射有燒尾晏食單法定

吳娘作其時會食聲脆沓驟春雨香風溢鄰家饒涎墮童
孺人生刺齒肥此外那足顧快意在噉嚼是亦算遭遇歸
來只跳躍喜若狙賦芋詩成疥短牆缺齧不成句字蹟學
驚蛇矯急誰能捕

元裕之溪南辛詩老傳曰元光初余與李欽叔在孟津
敬之自女几來爲之留數日其行也欽叔爲設饌敬之
放箸嘆曰平生飽食有數每見吾二弟必得美食明日
道路中又當與老饑相抗去矣

送陸子啟之彭城

東風二月不肯閒烘桃染杏成朱顏出門騎馬走送客雜
英滿路紅斑斑問君此別竟安適答云要上雲龍山我聞

彭城古西楚地勢莽濶推雄關歌風亭老花嵬瓌戲馬臺
古禽綿蠻千年陳蹟蝕不了怪雲恨蘚空麟鬪男兒作事
貴雄快毛骨詎受駑駘攀何須萬釘束腰帶到老尚點東
華班儒官苦守一囊粟握齠柔翰令人孱君今結束事大
濟曠望且破詩腸慳撫今只莫漫追昔昔人一去何由還
祇應儻葛日作達喚愁之草行須刪呂梁洪上弄長笛燕
子樓下尋雙鬢寶刀臨岐脫相贈我亦瑟縮循其環陸郎
竟跨班騅去使我神游徐沛間

石燕行爲零陵太守王良輔賦

君不見零陵燕雨時能飛晴時住翠尾涎涎雨倍新絳崖
灼灼晴如故從來微物亦通靈名艷山經併水經巴蜀漫
傳胸臆縣會稽空說結埼亭故人籍甚王文度美爾雙鳧
來

上巳修禊萬柳堂和益都夫子原韻

野圃秋尋甫昨年從遊更值入春偏空潭水色纔新織出
谷鶯聲已暗傳槐里衣冠殊蘊藉蘭亭天氣倍鮮妍獨憐
騎省多愁日不分垂楊又作烟

其二

禊日江東與客偕沙明水碧淨風霾如今寒食期都錯誰
道長安住亦佳三月年光消潑火一春心事惜分釵新詩
強和終難穩郢曲連翩未許儕

春日沙河城外恭送

仁孝

孝昭兩皇后梓宮紀哀二首

鳳翼逶迤翼曉風
敢塗迢遞日曛曛
雙移金盃宮初閉
並襲珠襦隧暗通天
上春經三月暮
人間淚作百花紅
君王自鼓離鸞引
哀策臣僚總未工

其二

極望山陵紫翠開

至尊親祖鳳城隈
涼蟾玉鏡圓仍缺
綵燕瑤筐去不回
長信花飛飄急雨
昭陽車過響輕雷
微臣私雇黃門感
併入簫笳此夜哀

連日同諸子小飲蔣元膚白丁香下感賦

丁香簾邊丁香香丁香一名花開時節倍悵悵團團畫掛

三更月露歷春飄
半院霜照處偏宜
紅蠟燭看時雅稱白
衣裳如何打得同心結
只與安仁助悼亡

余邸舍有老槐數本
夏日同程山尊葉桐初姚仲潛
徐郢伯諸子小飲其下
賦得老樹空庭得限兄字
心字兩韻

儆值原多暇
欣來好弟兄
眼邊春竟去
意外酒同傾
京雒饒花草
高低總發生
獨憐庭畔樹
搖落倍含情

其二

舊種柴扉樹
縱橫千畝陰
涉秋紅最早
當暑碧何深
僑寓仍荒圃
浮榮詎夙心
天風飄蕩汝
觸憂動微吟

次日偕諸子看花
豐臺山尊不至詩以惱之

喝雉呼盧態不馴
翩翩劇孟日相親
饒他芍藥紅如許
難

石老亦粗醜銅駝脫轡韉支祈掣械杻竟令淮泗間水怪
滿林藪臨風一摩挲淚學蠅珠瀏頻思一詰君愁悵仗君
剖野鴨響葦花難認門前柳含情卒未申咫尺限川阜兩
年大左計蹙若魚在筍醜顏號官人袍袴總泥垢殘冬接
家信室有病死婦所愧未忘情安能擊莊缶朝來乾鵲噪
剝啄到門牖頽然歛見君急起握君手思君亦已多今始
不相負更喜把君詩卯讀直到西鬱律騁蛟螭颯沓蟠蚪
蚪一語戲問君萬事本芻狗恒聞盜跖言童穉迄老壽屈
指一月中幾朝開笑口今君曰莞爾於義定奚取詎多笑
疾耶或者陸雲後君益大哈臺冠纓絕八九獨憐黃公墓
宰木拱如斗香醪徧長安美者葡萄醜沽以酌黃公頗復
賞此否風毋吹酒寒仍恐忤此叟

雨窗書允大冊子用東坡溪陂魚韻

茫茫眩眼添雜花耿耿春胸倚長劍跳瓦礫鑿雨脚脰籠
窗翻撲電旗閃風爐沸覺蟹眼碎水簾按經鴨頭染一官
自恨蟻盤磨萬事莫矜犀出塹縱使插貂踏省門詎如驅
豕還山店賦邁班揚讓爾工交方袁灌愁余借君嘖詩句
負何久我笑墨花貽尚欠允大曾許貽余古墨故戲及之豈期得雨肺氣
蕪何異聽鸚俗腸砭欣搖不律一吟寫所愧雕章遜華贍
厨中竹臛還有無小晴甚想葡萄醜

贈何御庵

尊人何武義司馬為先少保公同年

夜來急溜灑金鐵墮突屋瓦軍聲饗顛風莽雨倏飄忽別
挾灌木相唬諒病夫捷戶百無事抱硯起滌林塘坳前者
刻繇一幅紙翁攜要我揮唵毫比綠溽暑體劣劣赫蹶歷

疊叢蟪蛄今晨快雨歛疎豁放筆直下崩江濤憶從先世
附譜籍兩家臺省聯旌旄神宗委裘四十載葉芽稂莠煩
鋤薶東朝主鬯久不定闕廷萬喙徒喧呶有何狂詩一男
子白梃敢向倉琅操黃門嶽嶽叫閭闔呵護麟鳳驅蝗蝻
馮成龐保爾何物直攫梁竇供搜牢膺滂共事互激烈凜
凜氣與秋旻高兩臣直聲震天下蕉園汗簡畱孤標尊門
一事更枉酷太公白晝仇相遭南山於菟射不死磨牙吮
血溪風臊孤童奮自橐中出轉瞬弱翮衝烟霄免冠肉袒
請之帝父仇不報非賢豪刑章置獄駢頭列斃斫不異豬
羊孺人生君父二大事問誰憾不遺纖毫只茲忠孝兩無
負國成家乘爭揚褒翟泉鵝出銅犢橫喬木一半摧爲蒿
翁纔脫襁僑外縣迄今六十心煩切與子握手在碣石酒

酣說舊聲嘈嘈翁言吾亦欲歸耳連朝捫櫬還山包吾鄉
罨畫好烟水笋香可掘琬可陶胡用跋跋老爲客白髮強
對斜陽搔語翁安坐勿惆悵爲翁再進松花醪翁家郎君
美無度彩筆一掣驚吾曹他年策名上丘隴丹禽挾子歸
其巢君不見司馬豐碑縣門外虹梁巖業盤靈鼈百年蒼
蘚會拂杖賴爾傳家有鳳毛

徒步行

柴車啍啍紅牆下瀕洞塵灰没人髀官人保直入東華門
外停車換騎馬輿夫一月直四緡爾曹索錢橫聒人倘更
養馬益無力數借怕溷東西隣我生骨相原徒步高軒轟
隱非吾素相携况復有同官指點遙汀散鷗鷺道逢誰何
聯轡來十夫奪隘聲喧逐從奴楸轡倍光麗遙望戟手相

海海樓詩集卷八
哈臺我行弛緩避不得立向道旁土銜側人生邂逅亦偶然細故何至露顏色西山沐雨更鮮妍寄謝馬上諸豪賢區區幸不妨君轍慎勿嗔折珊瑚鞭

聽月樓爲毛司百賦

無風庭樹亦蕭騷帶月栖鳥見羽毛幽砌乍經啼絡緯空軒誰更摘檀槽三更粉壁寒堆雪一派冰輪怒捲濤夜靜星稀諸籟歇碧天依舊小樓高

海鹽女

海鹽徐氏女許嫁印家兒印家阿翁晝下帷誰何發屋扶屢屢提刀躍入白差差公然竈下橫其尸兒旁驚怖發狂癡嗚啞痲瘋牛羊鬪媼令閭姬來致辭已無婚理休然疑女今决絕勿復遲他家新婦須好爲阿女仰天言一一淚

作珠子垂女是徐氏女當年許嫁印家兒印家門戶碎亟須健婦相爲持登車不返顧入戶捐捐操帚箕翁家榻柎何纍纍疊若醬瓿鹽醪瓶一兒卧蓐如死灰舊鬼乞食新鬼饑妾身只十指手築馬鬣爲封之上堂奠饗屢病夫還復待哺糜茹荼雖苦甘若飴鄰姓切莫代妾悲但知同牢誼遑恤幃房私妾年已過而立歲至今自爲畫蛾眉

寄上栢鄉魏貞庵夫子

戊申躡屩走碣石公也正坐中書堂沙堤纔下火城散趣呼門士譚文章是年都城水大至九門一望俱混茫憶公召飲恰七夕渾河放溜聲礮硯狂飈捲雨舞軒砌樹梢瓜蔓森開張我公揮塵坐自若穿穴理窟雄辭場賦詩句必懾韓杜閻性論足排荀楊顧謂小子汝可語許汝負笈循

我牆手書徃復慰且誨赫蹠每月盛一囊隆冬別公適梁
宋給我扉屨資我糧人生歲月算不得破空烏兔何奔忙
霍如莊叟快說劍奮迅僥疾誰能當公歸東山又十載晞
髮慙駐恒山陽嗟予垂老倏遭際獻賦獲綴鷓鷯行宣武
門邊賃老屋與公舊邸還相望秋經向所命酒處葡萄壓
架榴坼房佳節矧逢仍七夕昔遊瓜果真難忘只今皇靈
讐炎荒南通叩笮收再馳伏波已下苴蘭城官軍新得滇
池王我公龍馬精神強行年六十髮正蒼千金渠口好花
竹鄙南詎得常相羊洛中司馬行再相會見綸綍來天閭

停帆詩爲廣陵潘楚吟賦

楚吟一生湘沔客我亦年年愛行役浙瀝迎潮慣濯船奔
渾放溜時揚席此時帆影最續紛半掠汀烟半浦雲屑瑟

細鋪鴉萬點冥濛低織雁千羣南船北艦何時了米估茶
商競言好倏忽銀濤雪浪來旁人亟勸收帆早黃牛白狗
萬重灘恠雨盲風頃刻間周瑜莫逞乘風便王濬方知下
水難江邊老翁殊可慕茅齋似舫沿江住爛散多年不出
門賣魚或到前村去碧蘆紅樹一番新水驛秋容處處勻
世間多少風波苦輸爾停帆淡蕩人

送少司寇馮再來先生暫假葬母

青蛉碧雞啼可憐甲光透日燠脂鮮白頭老溲忽作賊毒
霧直塞東西川緬蟲犵鳥太嵬璣髦牛祚馬紛鈎連臨海
馮公忠孝士一官正觸烏蠻烟艱貞濡忍得歸關雀立不
轉神狂癡回首滇雲一萬里九隆六詔何聯蜷此時妻孥
尚陷賊憶昔訣別誰遷延倉皇詎暇顧細弱漂泊何處租

蹄捷公更號呼殿墀下先時母沒悲重泉殊方絕徼歸不
 得土花繡血凝荒阡至今魂叫瀾滄側嗚呼臣罪真通天
 從來劫運有往復昆明灰黑曾幾年亂臣賊子莫浪喜會
 縛汝輩供炮煎 王師頃刻掃秋穰鏹削梁益恢左綿姜
 維膽自沓中破董卓臍又東京燃公家闔門固無恙與鳶
 跼水偕飛旋我公聞信作急請 詔下為許迎歸船爾時
 昭丘秋雨歇洞庭嫋嫋涼蟾圓一棺遠自蠻中落八口遙
 向濤頭穿死生會合渾一哭能不化作啼紅鵲公家赤城
 好巖壑溝兆恰枕山之肩如防合葬公事了越巫上食鳴
 神絃還思全家墮虎穿馬鬣豈料今能完茫茫痛定轉嗚
 咽灑灑淚盡翻潺湲願公節哀嚮公語忠孝固仗天週全
 矧公屢代擅節毋馳封絡繹恩駢闐傳芭絕瑟舞祠下干

載父老為加邁玉霄天姥多列仙公歸勿受仙靈牽太平
 燮理賴公等早晚擁篲沙堤前

早秋病後承涓清以詩枉訊依韻奉酬

空簷一夜淙淙雨牆脚戎葵已發生放朶恰逢新病後看
 花最動故園情斯人只合長丘壑何口真能變姓名莫笑
 比來渾嬾慢鈔方曬藥費經營

來詩結句有髯公心事本無營故戲答之

咏徐蝶園詩枕

蝶翁愛聲律不數東陽沈搢搢鼠搬薑營營鳩食甚有時
 興未屬引被覆面寢寘搜窮端倪玄感絕兆朕家有賢孟
 光巧心製佳枕質匪邯鄲磁紉用隴西錦空洞勝囊橐膨
 脰狀困廩為君克詩瓢助君潑墨潘我為一軒渠作計何
 不審未聞伯倫婦反導先生飲君入槐安國宜問槐安禁

睡鄉百萬家比屋消搖甚奈何役腎腸曉夜事雕侵蝶翁
推枕笑厚意我亦稔栩栩上花枝秋光正淄淄

送高念祖還嘉禾

經時伏枕入秋慵信到翻教惜別重兩載羈愁牽薊北一
帆歸興杳吳淞傳家事業青緇貴愛日庭闈淥酒濃西水
驛邊昏似夢自憐何日始君從

其二

馮李先生萬態刪只餘鄴架尚相關西鄰小別書同去南
浦微波客早還喜劇隔牆過濁酒狂來進艇翫晴山極知
倦圃秋燈下疾讀頻鈔又不閒

第二首并東秋岳先生先
生贈念祖詩有云貧許壁
魚依老髻怨疾征馬入通都且云念祖
在家時頗借書資我也故是章專及之

瀛臺賜宴恭紀

西苑新晴曉色開涼颼瑟瑟鳳城隈千官秋汎芙蓉舸七
月春生琥珀杯碧甃紅牆臨鏡出金簫玉笛拂雲催天家
殿閣清如水不信真從此地來

其二

黛幙參差紺榭通君王親幸日華宮四圍劍珮山光內一
簇貂蟬水色中雪瀑釀來粘綠箬錦鱗斫處映丹楓筵前
忽訝秋花滿林際朝衫葉葉紅

其三

續紛彩幣滿朝班賜出龍紋香漢間乍撫霜紈冰滑笏遙
擎霞綺月彎環絲從濯錦江頭曬衣向穿針節後頒爲聽
九門鴛杵急官袍分給侍臣還

其四

盡日天香染紫微鳳凰闕下拜恩暉才慚入雒年非少人
到游仙遇總稀縹緲携將菱芡重雕鞍壓得菱荷歸天南
又報鏡歌競早晚彤弓勞鐵衣

送王正子之粵東三水幕

王郎棲棲不得志三年三人長安中前年別我襄陽去女
兒不見如花紅悲歌燕市偏嗚咽去年又作溪河別安陸
城頭水拍天東湖村畔花成雪貧賤依人百不聊君今又
欲向高要蠻天抹厲香應滿海國檳榔瘴已消猩紅屐子
珊瑚扇番禺風景人爭羨蝶爲葛令鮑姑裙花是劉鋹宮
女面君家尚有白頭人何鐵疎狂亦近鄰何時送爾還鄉
去菰米蓴絲養老親

贈別方一位伯兼寄令弟素伯

開門風滿天落水群颺颺贈君當馬箠破空秣幽州男兒
狀昂藏詎熟媚與柔安能學穉妮老事東諸侯况君腹尺
豐藜莧懼不周未聞君夫輩日爲嚮快牛徒然短意氣那
便克乾餼昨君向我言近於丈八溝結茅三四把絕似蜻
蛉舟無窗不面花有月皆入樓長江舞吾砌老竹過人頭
蓄書苦不多難字細校讐村醪覺微甜亦似松花筍阿弟
稻花齋所隔只一丘有時駕老特同去看西疇喧呶里老
賽鴉軋田奴謳此樂亦滔滔底須彈蒯緱歸心飛鳥上一
往何能留憐余雖執戟亦君沮溺儔一官直自誤七貴難
與謀聞君工算經不數前何休煩君勾股術量我萬斛愁
未知屈宋後頗見有此不君精爛銅章猛力窮雕鏤我新
署怪魁大受羣兒咻君須撫繆篆爲我蟠螭蚪此事慎勿

忘亟以瓊瑰投忽復憶令弟關河莽修修遙知齋前稻此
時花正抽

送龍眠鄧田功之任唐山

田功最工集杜

縱陽皖口相縈抱江山英俊生文蒸曩時長者半父行最
說文忠骨格好呂蒙城下連鳧茨昔人一去那能追晚交
鄧子更儻莠才氣颯沓盤龍螭筆鋒冷淬芙蓉鏐一編集
杜尤竒作揃截雄篇腕下飛安排硬句空中落當其興到
非徒然北人使馬南人船昂藏頓挫丹青引感激淋漓諸
將篇渾河黃葉中原走爾去分符印如斗好種河陽縣裡
花莫逢飯顛山邊叟方二也位伯文忠之子孫揮鞭一笑同
出門栢人縣小官多暇定與聯吟秋樹根

贈高侍讀澹人以宜壺二器并係以詩

宜壺作者推龔春同時高手時大彬碧山銀槎漢謙竹世
間一藝俱通神彬也沉鬱并老健沙麤質古肌理勻有如
香盃乍脫薛其土刻畫雌鳧蹲又如北宋沒骨畫幅幅硬
作麻皮皴百餘年來迭兵燹萬寶告竭珠犀貧皇天劫運
有波及此物亦復遭荆榛清狂錄事偶弄得一具尚直三
千緡後來佳者或間出巉削怪巧徒紛綸臈茶褐色好規
製軟媚詎入山齋珍我家舊住國山下穀雨已過芽茶新
一壺滿貯碧色芥摩挲便覺勝飲醇邇來都下鮮好事椀
嵌瑪瑙車渠銀時壺市縱有人賣徃徃贗物非其真高家
供奉最淡宕羊腔詎屑膏吾脣每年官焙打急遞第一分
賜書堂臣頭綱八餅那足道葵花玉鞞寧等倫定煩雅器
淪精茗忍使茅屋埋佳人山此種不難致卓犖只怕車

麟麟未經處仲口已缺豈亦龍性愁難馴昨搜敗篋贖一
器亟走長鬣踰城圍是其姿首僅中駟敢冀拂拭克綦巾
家書已發定續致會見荔子衝埃塵

送家黃門非園假歸四明爲太翁越野先生稱九十

觴

金陵縣前江水白與君曾作金陵客官舍箋同榻硬黃衙
齋釀共傾重碧當時交態淡逾真爲說高堂有老親陸績
每藏懷裏橘季鷹長憶筋頭尊一官漫署牛馬走相逢又
在燕山口與君同館更相親眼中冠蓋君吾友男兒報國
雖文章要須奮筆排天閭羨君今已作臺諫如何暫欲還
江鄉君言一事我所急來歲太公方九十白髮將無倚里
間黃埃遮莫貪京邑家園風物百無嫌海蠹溪毛色色兼

蠟房紅迸臘脂殼筍籜黃抽玳瑁尖熙熙亭在晴江上遯
窩日日扶藤杖谷口霞成爛錦堆海門月作鎔銀狀君言
未竟我吟臺送爾吳船且晚開百年長愛登高節九日先
斟益壽杯太翁以九日
後一日壽

秋日送范秋濤暫假歸里

御河新水記聯吟俱爲尊鱸繫此心萬事直輸君果決三
年翻怪我侵尋卽歸耦已慚沮溺縱老游須繼向禽儻許
盤門真買宅結茅同棟太湖陰

其二

秋帆的的映層波纔說將歸姑若何九日定沽前路釀一
官難抵舊時蓑葦花橘樹江頭市月曉風清水面歌如我
何人希此樂但思濯足傍渾河

辛酉重陽後一日陪益都夫子游長椿寺兼送毛行

九閩游卽和夫子原韻

禊日從游萬柳堂序成欲擬右軍王好秋又過茱萸節野
興還尋舊葡萄鄉里入關山晴倍迴閒餐茗粥話偏長濁醪
粗飯身強健爲補登高到上方

其二

柄鑿休嗟世莫容且將吟屐寄狂踪千年海嶠飛仙鯉萬
樹離支走赤龍大有斑衣消歲月時行九省其
尊人入關底須彩筆
怨遭逢他年脫穎君家事易石灘邊暫採蓉

九月十九同賁黃理田公燮登慈仁寺內毘盧閣分

賦登高二韻

今朝也是重陽節傑閣岩堯試一登萬井夕陽明絕漠九

邊秋草冷諸陵乾坤疎放蕭蕭立欄檻欹危細細凭只有
花糕使人惱客中節物莽相仍

其二

四圍鈴鐸響刁騷一綫穿雲締構牢且以登樓當戲馬何
妨斲茗代持螯天連趙魏晴俱出松歷金元臘更高目斷
昆明池畔將何時歸鏡壓鞞刀時望平南
之信最急

送趙武昔郎中權關揚州

辭人例沿襲耳食類拾藩疇能裊孤吹獨有李秋錦謂武
曾
君嘗廷薦之謂彼鑠任沈李遇雖落落君義實凜凜自茲
欣締交願言一敷衽都城百難遂此意君亦審鬱鬱同心
言何由就君諗躊躇重躊躇流光最苒荏

其二

長安十萬戶何巷無清砧愁人一細聽始知寒氣淡聞君
淮南去一奏淮南吟微吟不成曲祇攪將離心夫君實望
郎江邊多橘林吟詩柁樓底吹笛關門陰獨惜金門子三
年長滯滯將飛慚弱悵望安能任

其三

明月廣陵橋斜陽玉鈎路苔牆薜柵邊悉我舊遊處自從
宦游來夢去亦屢屢今君颺華綬照耀臨江渚瀕行申片
言披豁叙情愫湖州狂太守謂圓次窮老江鄉住君其釀斗
酒亟趁官梅樹梅前時醉之是善爲奇句

贈董侍講默庵

京華冠蓋多交織日如鷲必逢賢豪人始可話情愫平原
董先生英爽炤衢路文籍雅縱橫容觀極魁梧每于單寒

子加以國士遇朔風何飄蕭同在一街住落葉滿四隣是
我齋前樹昨隨黃葉飛閒過下帷處先生正翛然匡歌著
繁露

其二

我家兩猶子鬻畚洮湖濱不知有何故來踏京都塵端也
態曲謹妮妮還踐踐枋也劇清狂頗患不得馴都不諳世
故難令遊大人先生一見之愛彼言笑真授餐更適館師
也骨肉均羈孤免凍餓確錯藉陶甄感激詎能忘千載猶
若新

其三

滇黔尚用兵至尊日拊髀遂令講幄臣出坐虎圍裡先生
妙裁量揆奮同一理盡收龍領侯大板鳶肩子歸來正懸

孤闔門歌燕喜前堂列鐘鏞後戶擁鞭箠千羣躐鞞紅一
片旌旗紫他年數李郭悉公門下士談笑立功勳致士自

隗始

先生時
典武闈

挽東明袁歐少并慰杜少同年

北地東明縣才人數二袁雙龍俱跋扈獨鷄早騰翻伯起
聲名大元方德業尊如何弱一個愁思總煩寬

其二

細讀賢兄傳臨風百感縈艱難扶弟姊瑣屑料瓶罌只覺
青袍誤偏慳白髮生鴿原遺恨極羈絆爲浮榮

屢過東海先生家不得見吳丈修齡詩以東之

最愛玉峯禪老子力追艷體鬪西崑

修齡精禪學又
善擬無題詩

朱門

縱視如蓬戶入幕長愁似隔村索飯叫號孫太橫鈔書歷

祿眼嘗昏此間赤棒喧虺甚隱几偏知處士尊

喜漢槎入關和健庵先生原韻

當時彩筆撼江關數子聲名天地間詎料文章遭貝錦偏
教冰雪鍊朱顏廿年苦語三更盡萬里流人一夕還不信
蛾眉真見贖感恩我亦淚潺湲

頌一時代贖
諸先生也

黃秋水新婚索詩輒題長句贈之

北風榆臘決土囊醬醃酒誑羣雷硯野翁瑟縮色如土
嚼齧護神枯僵隔街黃郎歛見過鞞刀縛袴姿昂藏自言
結縵昨宵是要我贈句翻清商心知此亦大左計我爲俛
首還付量班香詎落駮塚手宋艷豈生寒餓腸新詩鈎棘
不斌媚安足克汝牽烏羊況詩此際有底急雪片正欲霽
零颺鴛衾尚煖玉卮熱曷不桐酒添葱薑香奩韓偓句好

在縱好那關賢孟光答言我生癖嗜好愛詩奚啻同姬姜
一從杜韓不在世識君筆陣森開張儻然交臂一以失別
後山嶽勞相望感君雅意惜不得人道婚禮爲之綱只余
詩格苦孱弱請君歸頌關雎章

贈江寧家轉庵太守

粲粲元道州迢迢唐以還惻惻春陵詩千載誰敢刪後人
視蒼赤驅束同榛菅未常無子遺是詎與我關江東郡十
四處處嗟凋孱市駟豪舞文府史大作奸江寧踞會城建
瓴在鍾山牧伯得其人庶幾可廉頑公實慈惠師伯仲龔
黃間孤梅疎且硬雪瀑崢而潺知公軒元氣挹注編闡闡
近有陸與裴謂嘉定深陽兩君也英名耀人寰公況二千石益復誰
躋攀朝廷最循良綸綽了不慳直道公勿憂輿歌溢朝班

長歌送喬石林同年典試粵西

軟裘快馬我不愛荆娥越艷我不憐車前八騶作底物世
上七貴命在天只餘一事我最癖山水每怕人先鞭域中
奇秀首西粵九疑六管相鈎連當時補天石破碎一半竟
墮離江邊紺者織織翡翠羽施者歷歷胭脂錢黝者纍纍
醜婦瘦黃者蠹蠹新鵝拳訾家洲淺極窈窕袁家渴古紛
嬋娟鰕生兩脚夙有鬼青鞋布襪無因緣譬如腹貯藎百
甕見客說食空流涎同官爽朗得喬子才性燿若晨霞鮮
來年校士始安去殘臘先買零陵船此中山神待之久柳
宗元去垂千年文豪賦魁不在世賸有好景誰雕鐫地靈
人傑一朝合得不有象于星躔孺人跽捧破虎褥撞婦起
劈生彘肩江山雄俊落君手路縱遼遠寧遷延虞舜祠西

花滿川蕭韶石畔水鳴絃歸時莫買鬱林布到日定有蒼
梧篇

萬柳堂眺雪和韻

自笑朝來老眼昏只疑乘月踏前村原來是雪都粘袖總
不成花也斷魂萬木轟厯濤竟合諸峯滅沒髻猶存顛狂
苦挽行人問可有青帘漾寺門

其二

路入瑤京近玉河況逢歸將競饒歌天留草木迴春易地
不樓臺受雪多漫漫只思裝鳳闕紛紛還欲洗瑯戈昇平
恰值豐年瑞歸種茶坡與稻坡

時初聞平
滇捷音

除夕鈔戰國策戲作長句

晨窗未白風叫號吹折屋角樓欄梢意似欲捲歲華去非

止刮我三重茅此時長安馬上子怒蹄蹙踏花鬢搖不知

從奴手何物但見赤屬濃裹包窶人餽歲亦不廢勻酥製

餅漫棗餠豈惟微贄出臼磨

微贄出臼磨
東坡詩語也

亦用雉兔供煎

炮紛紛衢巷競相織語聲亂與風聲鏗吾廬聞若獨無事

眼看凍雀蹲堂均忽然勃谿滿門限煤逋米券紛嘈嘈官

今作人有階職何爲瑟縮慳錢刀鞠躬緩頰謝不敏我實

貧薄天所撻今年縱去有來歲爾輩慎勿輕譏謝須臾漸

散戶庭迥萬事撥置干牛毛故人曾惠官庫紙價壓澄心

兼薛濤紙膚瑩奪女兒滑硯眼碧作秋鷹頰比來頗喜戰

國策條硯劈紙爲膽鈔鮑彪高誘注瑣碎蕪秦陳軫談紛

呶此皆掘門捲樞士細如蟲豸如螭螭及乎伸眉一論列

礪硯擺劃翻螭蛟人生激昂在志氣老莊淡泊寧吾曹吾

湖海樓詩集卷八
萬柳堂

思當日著書者想亦感念生平遭杰然放筆一橫寫軒若
猛箭離弓消我書自覺字粗醜紙上蛇蚓徒蟠交只愁兩
手泚澣泚作苦還賴松花膠塗完十幅已曛黑瓶盆萬戶
如山高桃符爆竹莫相惱明日明年吾早朝

壬戌

和益都馮夫子禊日游萬柳堂原韻

青沙白石林塘幽短衫細馬行相求況逢三月正三日乍
可一年來一遊羃歷花鬢粉欲濕參差柳眼青還留磯邊
鷗鳥故拍拍曷不飛去凌滄洲

其二

禊節頻過汎羽觴幾年光景去堂堂鄉思最怕憑高閣吟
興偏期託野塘但使有花逢杜曲儘拚無夢到濠梁新添

二雨佳何限染得春流似碧湘

長歌奉送翼王陸先生南歸

班固六畧覆瓿荀勗四部克薪爇烟雲過眼日漸滅千
年秦火青幽幽先生矻矻嗜書籍窮餓偏側百不憂日作
蠅頭字千百兩腕苦脫神逾適京師雕板苦難致麻沙價
亦同天球侯門鈔本間常有緘滕只倩縹囊收安知此物
擅光怪不遭豪奪并巧偷先生京華四年住零丁

失物招帖也

第爲書爬搜傾筐剝皮尚不給闌入恒被僮奴咻自言羣
書浩烟海詎有心力攻毘聊作件繫編總目兼撮義例
窮根由祗貪油素不歸去如魚粘餌鷹戀鞵家書昨日抵
死勸老翁六十真何求自翁離家歲荒歉索租吏詬柴門
頭鈔書錄史有底急遮莫一念妻孥不幡然翁始動歸興

湖海樓詩集卷八
三
困書同上烏犍牛跨牛齧齧徧走別明朝便可踰蘆溝我
語先生歸去休世間萬事俱浮漚古來書癖等錢癖玩物
喪志前賢羞吁噉乎夙昔心胸荆聶儔老來經籍還伊憂
翁歸試上侯芭塚杜宇青山不斷愁

追憶侯子武功武
功先生高弟也

跋

伯兄生而穎異五六歲卽能吟吟卽成句 先大父暨
先大人鍾愛之甫齠齕爲延貴池吳次尾吳門錢吉士兩
先生教之兩先生交口贊 先大人游金陵同時則有周
仲馭方密之張芑山沈眉生顧子方冒辟疆梅朗三諸先
生子外舅侯公朝宗先大人讀書吳門則有文相國湛持
侯銀臺廣成徐宮詹九一陳黃門大樽張太史天如李舒
章楊維斗黃梨洲諸先生周旋贈答時伯兄髮始覆眉咸
隨侍側聆諸先生議論益刻意爲詩爲諸先生所賞識
先大人爲之刻湖海樓少作湖海樓稿今俱不存丙申五
月邁 先大人之變兄弟饑驅餬口四方如臯諸君子爲
伯兄重刻湖海樓稿其板在中表曹渭公處又刻射雉集

於維揚屬予師王宮詹阮亭先生手定今二十餘年其存
否亦不得問數年後伯兄詩益進又悔從前之刻有未當
也取射雉集重加刪訂次第編年斷自辛丑訖於壬子癸
丑至丁巳則肆力於填詞戊午就徵京師官禁近詩
益蒼辣奔放至壬戌捐館搜其遺集皆伯兄手錄成帙多
鉅公名家所丹鉛者石盡刻之分爲八卷以備當代大
君子論定焉嗟乎吾兄驚才絕艷晚歲始拜一官而又不
祿心切慟之石以其文學宦蹟白之當事於康熙二十
七年三月念有七日同先大父先大人崇祀鄉賢一
堂四代先曾祖孝潔先生祀於前明几筵俎豆世世享之九原有知兄
亦可以鑒予懷矣戊辰小春四弟宗石謹跋于彊善堂

跋

大兄詩凡三變少而師事雲間陳大樽先生爲詩高渾鮮
麗出入于陳杜沈宋高岑王孟叅以溫李含英咀華風味
不墜所謂湖海樓少作湖海樓稿者是也旣而客遊羈旅
跌蕩頓挫浸淫於六季三唐才情流溢而詩一變所謂射
雉集者是也晚而與當代大家諸先生上下議論縱橫奔
放多學少陵昌黎東坡放翁而詩又一變大兄臨終時自
云吾詩在唐宋元明之間不拘一格其詩學之成歟今集
自辛丑迄壬戌詩是也四弟旣刻其古文全集矣復取而
授之梓得若干卷視京少天藜閣所選爲備湖海樓少作
湖海樓稿已刻者今不載丁卯冬十二月弟維岳謹跋


第 35680 号

平成 3.11.22

聖和学	928
園短大	4
図書館	8

海海相言集

患上堂



周

